

التعبئة الخاطئة  
(2)

الكتاب : التعويذة الخاطئة 2

المؤلف : محمد عصمت

تصميم الغلاف :

تدقيق لغوي : أحمد أسامة

رقم الإيداع : 2016/14326

الترقيم الدولي : 978-977-778-066-7

الطبعة الأولى : 2016

20 عمارات منتصر – الهرم - الجيزة

ت-011-27772007 02-35860372

[Noon\\_publishing@yahoo.com](mailto:Noon_publishing@yahoo.com)

جميع حقوق الطبع والتوزيع محفوظة للناشر



# التعويذة الخاطئة

( 2 )

رواية

محمد عصمت

للنشر  
والتوزيع

Obseikan.com

## إهداء

لكل من أراد أن يضحك وينسى القليل من الهموم التي حاصرتنا حتى  
صبرنا نشعر أنه عالمهم وأتينا دخلاء عليهم ... أتمنى أن تروك الرواية  
وتستطيع أن تنتزع من قلبك ولو ضحكة واحدة فقط

اضحك ... محدش واخذ منها حاجة

ملحوظة :

يا رب الناشر ما يشوفش الإهداء ده لأنه بيتضايق منى عشان بعمل  
إهداءات كتير.

ملحوظة 2 :

الناشر شافه وجاى عليا أهورينا يستر.

ملحوظة 3 :

أنا كويش الحمد لله والناشر معمليش حاجة وحشبي الله ونعم الوكيل.

ملحوظة 4 :

أنا بهزر طبعًا والناشر ما يقدرش يعمل حاجة ... إحنا جامدين أو...

طب بتشتتم ليه طيب دلوقت؟

الله يسامحك ... مش هرد عليك أنا

برضه الله يسامحك

إنت عارف أنا مش عاوز أرد عليك ليه؟ مش عشان أنا مش قادر ولا عارف  
أرد

لأ خالص ... عشان إيدك ثقيلة وبتوجع أوى

## إهداء واجب

إلى رفيقة دربي وجنتى وسر سعادتي

إليكِ وحدك يا من تملكين مفاتيح سعادتي وتحيلين حياتي جنة خالصة لا  
حزن فيها.

إلى عيناك التي أرى نفسي بهما رجلاً لا مثيل له

وإلى قلبي الذي ينبض باسمك

ربنا يخليكي ليا

\*\*\*

رفيق الدرب : محمد على على

شكرًا يا كبير وربنا ما يحرمك منى ولا يحرمنى منك

Obelikan.com

## ملحوظة مهمة قبل القراءة

هذه رواية لم تكتب لتخلد ضمن الأعمال التي سيذكرها التاريخ ولم تكتب كي تنحت اسمى واسمها ضمن عظماء الأدب المصرى والعربى وهم كُثُر

ولم تكتب لترشح لجائزة كبيرة ولا لصغيرة أيضاً

هذه رواية كتبت من أجل هدف واحد فقط وهو الضحك ولا شيء غيره لذا رجاءً قبل أن تقرأ ابتسم فأنت الآن تدخل على رواية كوميدية واحنا جايين نهرج أصلاً

مساء الفل

oboiikan.com

بمجرد أن فتح الساحر الباب للجميع كي يدخلوا حتى وقفوا مشدوهين، تحيط بهم الدهشة من كافة الجوانب لتعصرهم كما تعصر قلبك رغبة الفرار من مواقف مهلكة، وقتها ووقتها فقط تيقنوا أنهم لن يفسلوا في مهمتهم التالية، لأنه لا وقت للفشل ولا حتى للتجربة التي قد تؤدي للفشل، بداخل الشقة الصغيرة التي تساقط الطلاء باحتجاج عن أحد حوائطها مئات بل آلاف السير الذاتية الملقاة بلا ترتيب أو اهتمام، العديد والعديد من الأوراق المبعثرة في جميع أرجاء الصالة بلا مبالاة، دخل الجميع إلى باب الشقة وهم يتأملونها لفترة قبل أن يبادر الفامباير بالحديث للساحر: "طب إنت حضرتنا ليه؟؟، إنت كنت هتطلع على شؤون الطلبة بتاعة جامعة القاهرة وهناك هتلاقى مدام عفاف بتاعة الشؤون، ما تسألش عليها وما تتعبش نفسك، هات أى موظفة قاعدة تاكل طعمية أو تقور كوسة وساببة شغلها واطلب منها تظبطلك الورق ده"

نظر الساحر لمساعدته وكأنه لم يفهم وهو يسأله: "أيوة يعنى إنت عاوز إيه؟"

نظر الفامباير له بئس وهو يقول: "إنت مش عاوز فريق وحوش خارقة كده ... إنت عاوز فريق من شؤون الطلبة، فريق موظفين راضعين روتين وبيروقراطية ... انت ع ..."

في هذه اللحظة قاطعته مديحة: "طب التموين وعارفينه ... البيروق  
... البيروق ... البورو ... البتاعة دي تطلع إيه يا سي الفامباير؟ "

ربت الفامباير على كتفها بشفقة وهو يهمس لها في أذنها ببضع آيات  
من القرآن الكريم كي تهدأ وتتركه لحاله الآن قبل أن يعود للساحر متسائلاً  
بدهشة: "إيه ده كله؟؟ فيه إيه؟ "

ابتسم الساحر بفخر وهو يقول: "أصل أنا عملت إعلان في الوسيط"

ابتسم المذئوب وهو يقول: "يا فرحتي بيبك ... أنا فخور بيبك جداً ...  
مش بس المساعد بتاعك هو اللي كان غبي دا إنتم ما شاء الله عليكم  
بقيتوا أغبي من بعض"

حاول الجنى أن يتحدث: "أباأباأبو...."

قاطعته القط: "استنى إنت بس دلوقتي الله لا يسئلك أما نشوف  
المصيبة دي وبعدين نشوفك عاوز إيه"

قبل أن يتوجه بحديثه إلى الساحر متسائلاً: "عملت إعلان في  
الوسيط مكتوب فيه إيه؟"

أجابته الساحر ببساطة شديدة وكأنه لا يعي خطورة ما فعل:  
"مطلوب فريق وحوش خارقة للسيطرة على كوكب الأرض وحطيت رقم  
تليفوني وعنوان البيت عشان الوحوش يبعثوا السي في بتاعهم"

سأله الفامباير: "والشرطة؟؟"

رد المساعد سريعاً: "جالنا نقيب واتنين عقداً ولواء بس رفضناهم،  
فيه ناس تانية فرصتها أحسن"

نظر المذؤوب للفامبير متسائلاً: "تفهمة غلطه إنت ولا أفهमे غلطه  
أنا؟"

قال القط بصوتٍ عالٍ مختنق من شدة الغضب: "وما عملتش  
إعلان على كوبرى أكتوبر ليه يا حبيبي؟ مش كان هيتشاف أكثر؟"  
"حاولت والله بس إنت عارف بيتكلف كام؟؟ ... إعلان الوسيط  
أرخص وأسهل"

"يا سلام على النباهة والنصاحة والمفهومية، يا سلام على الدماغ  
الى بتنقط المآطات، دا أنا سعيد ببيكم سعادة لا توصف والله"

جلس الفامبير على مقعد فارغ قبل أن يقول: "بغض النظر عن  
الكوارث الى إنت قاعد تعملها واحدة ورا التانية بدون أدنى ذرة تفكير أو  
فهم، ناويلنا على إيه؟"

"أبدأ الموضوع بسيط، إحنا هنبدأ نفرز السى فمات دى ونختار منهم  
الكويس وبعدين نعمل لجنة ونبد...."

قاطعته مديحة بفرح وهى تقول: "لجنة لأ الله يباركك، أنا ضاربة  
بانجو وهتحبس ... يا عيني عليكى وعلى شبابك الى ضاع ورا القضبان يا  
مديحة"

أجابها الساحر بنفاد صبر: "إهدى يا مديحة، لجنة مقابلات مش  
لجنة شرطة ... وبعدين اللهم اجعله خير، إنتى خايفة من الحبس !!!، أول  
مرة أشوفك خايفة من حاجة"

أجابته: "حبس إيه بس، أنا خايفة من ريهام سعيد ... هتقرفنا فى  
عيشتنا ومش ندمانة وبتاع وأنا خلقى ضيق ومش حملها"

فكر الساحر للحظة وهو يقول: "والله ليه لأ؟؟، فكرة حلوة، تيجوا  
نضمها للفريق؟"

انحنى الجنى على قدميه يقبلها وهو يقول له برسالة عقلية: "أبوس  
رجلك لأ... عشان خاطرى أنا"

نظر له الساحر بدهشة وهو يقول: "إنت خايف منها ليه إنت  
كمان؟؟"

"أنا جنى هتقعد تقولى اطلع وأنا السلم على عليا والروماتيزم  
مبهدلنى"

تجاهله الساحر وهو ينظر للفامباير الجالس على الكرسي واضعاً  
قدمًا فوق أخرى وخلفه تقف مديحة بشعرها المجمعدهم تهرش رأسها بحثاً  
عن شيء تأكله وهو يقول: "زى ما قلتلكم هنفرز الورق ونختار المرشحين  
الأقوى عشان نختار واحد بس منهم وبعد كده نتحرك عشان نحقق حلمنا  
... نسيطر على كوكب الأرض"

غرفة مظلمة للغاية وجدران زحف عليها العفن ليسقط طلائها أرضًا كي يظهر الشق الذى قسم قلب الحائط الشمالى، يتوسطه نافذة خشبية كُسر زجاجها فأغلق شيشها بلا ساتر زجاجى يحمى الجالس بها شر البرد، برواز يتوسط الحائط المقابل لها به صورة لشخص منكوش الشعر أحول العينين يمسك بيده مصاصة كبيرة ويبتسم ببلاهة، يتأملها شاب لا يتعدى منتصف العشرينات من عمره، السمة الغالبة على هذه الغرفة هى الضباب، ضباب دخانى يملأ فراغ الغرفة لدرجة تصعب معها الرؤية، كل هذا الدخان يتصاعد بعنف من مبخرة صغيرة تتوسط الغرفة، فى أحد الأركان هناك فراش صغير ينام عليه رجل فى منتصف الثلاثينات، تلملم الرجل فى نومه قبل أن يسعل بسبب الدخان ويقرر أن يعتدل على الفراش، تأمل الدخان والمبخرة قبل أن يقرر أن لا مفر من سؤال الشاب فبادره بالسؤال: "إنت بتعمل إيه يا ابنى؟؟"

"أآ... أآآ... أبداً مفيش"

"إنت بتحاول تحضر جن تانى؟"

"لا لا... جن إيه بس... أنا أتفه من كده صدقنى"

"أنا أسف إنى أسأت الظن بيبك وظلمتك وفكرتك بتحاول تتعلم

منى"

"أنا المساعد المخلص بتاعك يا باشا... عمرى ما هتعلم منك أبداً"

"مالك؟"

"أقصد يعنى إنت مينفعش حد يتعلم منك"

"عاوز إيه؟"

"أنا قصدى أكرمك والله يا باشا بس"

"اللى عاوز تقوله وصل يا حبيبي"

"إدينى فرصة بس أفهمك وجهة نظرى"

"إدينى إنت فرصة أحتفظ بالباقي من كرامتى وقولى الجن اللى أنا  
قلتلك تحضره وساعدتك فى تحضيره إمبراح فين؟"

"نزل الوكالة يجيبه غيارين ولسه مكلمه من شوية قالى إنه راكب  
المترو وجاى"

"مت إيه؟؟"

"المترو ... ابن حلال أهو وصل أهو"

دخل إلى الغرفة شاب وسيم الشكل متوسط الطول ومتناسق  
القوام وبمجرد أن أغلق الباب حتى تحول شكله ليصبح طويل القامة  
منحنى الظهر أحمر اللون، له قرنان معقوفان فى مقدمة رأسه وفمه  
الواسع يكشف أنياب مسوسة مهشم معظمها بشكل لا يخفى حدتها،  
مرعب الهيئة للغاية، تجاهل الرجل هيئته المرعبة وهو ينظر له بغضب  
ويقول له: "شرفت يا بيه؟"

لم ينتظر الساحر رده قبل أن يأمرهم الرجل بالجلوس أمامه وهو يبدأ حديثه بجديّة بالغة: "أنا اسمى الساحر تامر ... وزى ما قلتكم قبل كده زميلى الساحر ماهر محضر فريق وحوش وعاوز يسيطر بيه على كوكب الأرض ... خطته عاجبانى أوى لأنها مترتبة ترتيب منطقى ومحطوط لها احتمالات وفرضيات علشان يتكتب لها النجاح وبصراحة عاوزين ناخذها منه ... إحنا هنسيه يسيطر على الكوكب وبعدين نخطفه منه وبكده نبقى حققنا انتصار متكامل الأركان"

رفع المساعد يده للأعلى طالبًا فرصة للسؤال، نظر له الساحر قبل أن ينظر للأرض وهو يقول بهدوء: "لو هتستظرف أو هتستخف دمك بلاش"

تجاهل الجنى ما حدث: "أنا عندى خطة حلوة أوى ... تسمعونى؟"

هز كلا منهما رأسه بالإيجاب والحماس يلتمع فى عينيه بشدة فبدأ الجن كلامه: "الساحر ماهر ضمن فريقه جن تانى، اللى عرفته إنه أخرس وبينقل لهم الكلام عن طريق التخاطر، أنا ممكن أخترق الشبكة التخاطرية دى وأنقل لكم الكلام بتاعهم وبكده نبقى سابقينه بخطوة"

استحسن الساحر الفكرة بينما ظهرت علامات التفكير على المساعد لوهلة قبل أن يقول: "طب ما إحنا ممكن نمشى بسرعة شوية وهنسيقه بخطوة وكل حاجة يعنى"

نظر له الجنى والمساعد قبل أن يقررا تجاهله كما لو لم يكن موجودًا معهما فى الغرفة، خاطب الساحر الجنى بصوت هادئ: طب حلوة أوى الفكرة دى، ابدأ فى تنفيذها فورًا"

صمت الجنى قبل أن تشتعل نيرانه وتستعر نيران تركيزه وهو يقدح  
زناد فكره، قلب عينيه للأعلى فظهر بياضهما الذى اقترب من اللون الأحمر  
وظفق لبعض الوقت يسبح في بحور الهدوء قبل أن يفتح عينيه فجأة وهو  
يبتسم ويقول للساحر: "تم يا باشا"

"طب شوف هتقدر تسمع إيه كده؟"

صمت الجنى لبعض الوقت قبل أن تتبدل ملامح وجهه للاشمئزاز،  
سأله الساحر ماهر بفضول: "ها ... سامع؟؟"

لمعت عينا الجنى بفرح وهو يقول: "حلو أوى الكلام ده، أنا تقريبًا  
عرفت الخطوة الأولى في خطتهم"

بدأ الساحر يقسم المهمات بين الفريق فقرر تكليف القط والمذؤوب والمساعد بفرز السير الذاتية للمتقدمين واختيار المناسب منهم بشكل مبدأى قبل إجراء عملية التصفية النهائية التى سوف تثمر عن عضو واحد فقط سينضم للفريق بعد حين، فى حين أن مديحة والفامباير قررا القيام بعملیات ترتیب خفيفة فى البيت مع القيام بواجبات البيت من تنظيف وطهى واهتمام بالوجبات الخاصة لهذا الفريق الخاص والخاص، بدأ القط فى البداية فى الإمساك بالسير الذاتية منها ما يعطيه بدوره للمذؤوب ومنها ما يلقيه بعيداً، إذا ما أعجبت المذؤوب السيرة الذاتية للمرشح يعطيها بدوره للمساعد، إذا استقر الثلاثة على صلاحية المرشح كان من ضمن المجموعة التى وصلت للنهائيات وستدخل ضمن عملية التصفية النهائية، إن تم استبعاده من أحد الثلاثة فهذا هو حظه وعليه أن يبحث له عن مهنة أخرى سوى الانضمام لهذا الفريق، بدأت السير الذاتية تتراكم فى صفيين بين مقبول ينتظر الحكم النهائى ومرفوض ينتظر البحث عن مهنة أخرى، فى غرفة داخلية تقف مديحة وهى تمسك بطرف الوسادة بينما يفتح الفامباير غطاءها ويحاولان باستماتة توفيق هذا مع ذلك وفجأة توقفت مديحة ونظرت للفامباير وهى تقول : "عارف يا سى الفامباير أنا وافقت أتجوزك ليه؟"

نظر لها بدهشة وهو يقول: "وافقتى !! ... وافقتى إيه يا مديحة بس

هنهزر؟"

فتحت مديحة المطواة في الهواء فأصدر حدها صوت مرعب وهي تقول: "نعم؟؟"

دُهِشَ للحظات قبل أن تظهر علامات الفهم وهو يقول: "طبعًا وافقتى ورضيتى وده من حسن حظى وكرم أخلاقك يا ست الكل"  
أغلقت مديحة المطواة وأخفتها في ملابسها باحترافية وهي تقول:  
"إوعى تكون فاكر إن قطر الجواز فاتنى!"

"فاتك! ... دا داس على وشك يهدلك، لا يهدلك إيه ... دا فرمك"

"نعم يا أخويا ... دا أنا خراط البنات خرطنى"

"خراط البنات إيه اللى خرطك بالشكل ده؟ ليه إن شاء الله ... إيدته الشمال إتثلت وهو بيخرط ولا كان كفيف ولا إيه بالظبط؟"

في هذه اللحظة دخل الجنى إلى الغرفة بصحبة الساحر يبحثون عن سبب صوت الفامباير العالى، وقفوا في الغرفة يتأملان الفامباير الذى يقف محمر الوجه وحده قبل أن تقفز مديحة من خلف الباب وهي تقول:  
"عوووووووووووو"

صفعها الساحر على وجهها وهو يقول: "بطلى تفاهة وإطلعى برا  
عشان هنبدأ فرز المرشحين"

خرجت وخرج الفامباير خلفها وقد بدأ يهدأ قليلاً، جلس الجميع في الصالة وبدأ القط في استعراض المرشحين بشكل مسرحى للغاية: "معانا النهاردة خمسة مرشحين للانضمام للفريق من الشركة السعودية ... واحد

يسألني ويقول يا أستاذ محمد إيه اللي يفرق الخمسة دول عن الباقيين،  
هقولك أنا ... الخمسة دول هم .... "

نزعت مديحة حذاءها ورمته نحوه فتفاداه بفرع وهى تصرخ فيه: "هى  
حنة أختك يا عم القط ... خلص"

حاول القط استجماع شتات أفكاره مرة أخرى وهو يقول لها: "أنا  
أسف ... المرشح الأول سوبر محمد السيد مان ... شهير بسوبر مان"

رفع المساعد يده وهو يقول: "مرفوض طبعًا ... دا بيلبس البتاع فوق  
البنطلون ولو نزل معنا مهمة فى شارع جامعة الدول هيتشقط ... وأعتقد  
إن شكله وهو حامل مش هيبقى حلوى يعنى"

أجابه الساحر: "يبقى بلاش منه ده ... شوف اللى بعده"

رمى القط السيرة الذاتية بعيدًا وهو يمسك بأخرى ويقرأ الاسم:  
"الجوكر"

أجابت مديحة بفرح: "بتاع الكشرى؟؟"

ظهرت علامات الغضب على وجه الفامباير وهو يقول: "مش معقول  
كده يا مديحة ... هنضم الجوكر بتاع الكشرى معنا ... ههنزر ... إنتى مش  
عارفة قيمة الفريق؟"

ظهرت علامات الاستحسان على وجه الفريق بينما استدرك  
الفامباير واستطرد مكملاً كلامه: "أكيد طبعًا الجوكر الحلوانى ... عليه  
شوية بسبوسة بالقشطة إنما إيه قشطة"

صمت الساحر وقد نكس رأسه أرضاً باحثاً عن حجر ما يشج به رأسه لينتحر ويرتاح من هذه المجموعة فلم يجد بينما استكمل القط: "الجوكر بتاع بات مان يا جدعان"

هز الساحر رأسه وهو يقول: "مش هينفع ... ده مجنون وإحنا معانا فعلاً عنصر مجنون في الفريق ... اللى بعده"

نحاهها القط جانباً وأمسك التي تليها وهو يقرأ بصوت جاد: "كان في اقتراح بضم النينجا ترتلز للفريق وأهو منها برضه المعلم رشدان أحسن سنه كبر ودوناتيلو عاوز يحطه في دار مسنين"

هو الجميع رأسهم وهم يقولون: "مش هينفع العدد كبير جداً وكده هنتلخبط"

أمسك القط السيرة التي تليها وهو يقول: "رابعاً فيه كاتب رعب اسمه محمد عصمت مقدم السيرة الذاتية بتاعته وبهددنا إننا لو مضمينا هوش للفريق هيكتب عننا رواية كوميدى ويفضحنا"

فكر الساحر للحظات: "الأ ... مش هينفعنا وبعدين إحنا ما بنتهددش ... أنا هبعث له مديحة تعرفه إحنا مين"

صوت رسالة على هاتف القط المحمول قاطعت حوارهم، قرأها القط وهو يقول: "محمد عصمت باعت يقولك أسفين يا باشا والله ما نقصد بس بلاش مديحة أبوس رجلك"



نظر لهم الساحر وهو يخرج من الغرفة قبل أن يغلق بابها خلفه ويقف أمامهم مبتسمًا وهو يقول: "أنا كلمته وهو جاى ... الصراحة طلع راجل ذوق أوى ومحترم وبيعرف يتكلم عربى على فكرة"

أجابه المذؤوب: "طب الحمد لله ... دى حاجة كويسة وهتسهل علينا التعامل سوا أوى"

هز الجميع رأسهم بالموافقة قبل أن يقول الساحر: "دلوقتي المرحلة قبل الأخيرة، هحضر آخر عضو معانا فى الفريق لحد ما الأستاذ جاكى يوصل ولما يوصل بالسلامة هنروح وجهتنا الأخيرة، مرحلة ما قبل السيطرة على الأرض"

انصرف لجميع لما يفعل بينما دخل الساحر ومساعدته والقط إلى غرفة داخلية لإتمام مهمة تحضير العضو الأخير

\*\*\*

جلس الفامباير بجوار مديحة يتأمل عيناها قليلاً قبل أن تقول له: "أنا عارفة على فكرة"

بدأت علامات الخوف تظهر على وجهه وهو يقول: "عارفة ... عارفة إيه؟"

"إن عينيا أجمل ما فيا؟"



"لا أكيد مش هعرف ... هعرف منين يعنى؟"

"مالك النهاردة؟؟ ... ما تسكت"

"حاضر ... بس إنت مقلتلش مديحة بتمثلك إيه فى العيلة؟"

"عارف إنت لما بيقالك عم أو خال رخم وبكرش وكل شوية يغلس عليك ومفكر إن دمه خفيف وإنه كوميدى وكده وهو إيفماته بتجيب إيدز أصلاً وبتحتاج تتعالج بعد كل إيفيه سنة ونص"

"أيوه عارفهم أنا الناس دى"

"ما تبقاش تقعد معاهم ... المهم مديحة دى حاجة زى مرات الأب كده ... لا إنت عارف تحبها عشانها مش أمك ولا إنت عارف تكرهها عشان مشفتش منها حاجة وحشة"

"اللى هو زى محمد سعد كده ... لا إنت قادر تتفرج عليه عشان ما بيضحكش ولا إنت قادر تقلب القناة عشان الريموت بايظ"

"طب ما تطفى التليفزيون!"

"تصدق صح؟؟ كانت تايهة عنى فين دى؟"

"تلاقيك خدتها حنة زحمة وممسكتش إيدها كويس فتاهت منك"

\*\*\*

كتاب مصفر لون وريقاته ومصنوع غلافه من جلد بشرى ولكنه ليس كأى جلد بشرى، جلد إنسى ذاق العذاب والويلات ليالٍ طويلة، ينقع الكتاب قبل استخدامه فى قدر من الدماء الطازجة لمدة أسبوع كي تتحرك

طلاسمه وتحيا لیساعد مستخدمه على القيام بمهمته القذرة. راقب الساحر طلاسم الغلاف وهي تتحرك بشكل عمودي، تنكمش تارة وتكبر ليشعر أنها ستحتل العالم تارة أخرى قبل أن يشعر بالكتاب يناديه ليفتحة، فتح الكتاب على صفحة معينة غير مبالٍ بالدماء التي لطلخت يده وتحركت في سرعة لتختبئ بين ثنايا مسام جلده كأنها تلوذ به من شر الكتاب، اختار الصفحة التي يبغها قبل أن ينظر للقط والمساعد وهو يوجه كلامه للقط أولاً: "أنا اخترتك معايعاشانك حكيم، أيًا كان الوحش الى هنحضره هتعرف تتعامل معاه، تمتص غضبه وتفهمه إنه لازم يسخر كل قوته عشان خاطر الفريق، لازم نقدر نفهمه ده من البداية عشان نبقي متأكدين إننا هناخد 100% من قوته وطاقتة عشان رفعة الفريق"

ثم نظر للمساعد وهو يقول: "أما إنت فيعلم ربنا إني مختارك عشان لو سيبتك بره مش بعيد ألاقى مديحة رابطاك من رقبتك وبتأكلك"

نظر المساعد أرضًا فتساءل الساحر بصوتٍ عالٍ: "مش عارف دماغى كانت فين يوم ما اخترتك"

"دورت كويس؟؟ هتلاقها كانت هنا أو هنا"

نظر الساحر للقط الذى أراد أن يقفز ليأكل جزء من رقبة المساعد لولا أن أمسك به الساحر جيّدًا وهو يقول محذرًا المساعد: "خد بالك موسم التزاوج بتاعه قرب وممكن أسيبه عليك يهدلك"

بعد أن هدأت الأمور بدأ الساحر في تحضير العضو الأخير، رتل تعويذته بصوتٍ عالٍ أقرب للتوحش وظهرت عليه علامات المقاومة وهو يصرخ بطلاسمها بينما بدأت رياح قوية تهب في الغرفة برغم إغلاق كل

الأبواب والنوافذ، بدأت الأوراق تتطاير من الغلاف وبدأت شعلة صغيرة من النار تمسك بطرفه إلا أن الساحر تجاهلها، في خضم هذا الأمر أخرج المساعد علبة سجائره وهو يخرج سيجارة ويقترّب من الشعلة التي تشعل الكتاب محاولاً إشعالها قبل أن يركله الساحر في بطنه لئلا يتعد عنه، هالة من ضوء أصفر شاحب متداخل مع لون فيروزي بدأت تتكون وبدأ يظهر شكل غير مميز الملامح بداخله، كلما صرخ الساحر بالطلاسم والتعاويذ بدأ يتضخم، جسد قوى العضلات ضخم التكوين يبدو عليه القوة العاتية والشراسة، صمت الساحر وقد بدأ ينشج ولم يستطع الإكمال وبسرعة خطف القط الكتاب وبدأ يقرأ بصوت قوى مكماً التعويذة من حيث توقف الساحر، لم يلاحظ أحد تبدل الشكل الذي بداخل تلك الهالة بل ربما لاحظوه لكنهم لم يهتموا به لأن الأمر مهم فقط في النهاية التي اقتربت بشدة، أنهى القط التعويذة وهو يسقط أرضاً من التعب قبل أن تدور الهالة في قوة وتتوقف فجأة ليظهر المسخ الجديد جلياً داخلها، فتح الساحر ومساعدته والقط أفواههم في دهشة، مهما بلغت خيالاتهم لم يكن أيهم يتوقع أن يحدث هذا

ظهر التركيز على وجه الجنى مرزوق فصمت الساحر ماهر تمامًا ونهر مساعده وراقباه بعيون تتقد فضولًا، لحظات وسأل الساحر بصوت هادئ: "ها .. سامع حاجة؟"

هز الجنى رأسه بصمت وعلامات التركيز ترسم بشدة على وجهه قبل أن يتنفس بعمق وهو يقول: "فيه حاجة جديدة حصلت بس أنا مش قادر أعرف هي إيه تحديدًا بس واضح إنه حدث مهم" ظهرت علامات الحيرة على وجه الساحر وهو يسأله: "عرفت منين إنها حاجة مهمة؟"

"زى ما قلتك الساحر ومساعده والقط دخلوا غرفة في البيت وبدأوا في تعويذة جديدة لاستدعاء مخلوق خارق أو وحش كاسر من العالم الآخر عشان يساعدهم في مهمتهم لكن اللي سمعته وكان بصوت واطى كمان عشان الجن بعيد عنهم هو حاجة ظهرت أمامهم وكلهم شهقوا مرة واحدة!"

ظهرت علامات الذكاء على وجه المساعد وهو يقول: "طالما شهقوا يبقى بيعملوا ملوخية .. مش محتاجة يعنى"

نظر له الساحر وهو يزفر بنفاذ صبر قبل أن يأمره بعدم الكلام مرة أخرى قبل أن يستدير للجن وهو يأمره أن يستعيد تركيزه مرة أخرى

ليعرف ما الذى يحدث هناك، قبل أن يبدأ الجن مرة أخرى قال المساعد:  
"بس الجن الجديد ده بسم الله ما شاء الله عليه يعنى ... هيفيدنا أوى"

لم تمر لحظة إلا وكان الجنى محترق أمامهم تمامًا بسبب ذكر الله  
كونه من الجن الكافر ولم يتبق منه سوى رماد متطاير، نظر الساحر  
بغضب إلى مساعده الذى تركه ليختبئ خوفًا من بطشه

\*\*\*

وقف الوحش الجديد أمام الساحر ومساعدته والقط وهو يتسم  
بفرحة قبل أن يقول: "حزروا فزروا مين اللى رجعلكم تانى؟"

كان الساحر أول من أفاق من ذهوله قائلاً بغضب: "حزروا فزروا إيه  
يا حبيبي ... ما إنت واقف أدامنا أهو ... وبعدين جرى إيه يا زومى ... أنا ما  
وراييش غيرك يا ابني؟ ... حرام كده والله"

أجابه الزومى وهو يضحك: "يعنى مش فرحان إنك شوفتني؟"

رد الساحر بسرعة: "لا"

"بذمتك؟"

"والله لا ... هو أنا يعنى هضحك عليك ليه ... أنا كارهك وكاره الكتاب  
الى جابك تانى ده وعلى فكرة والله مش عشان إنت واقف أدامى ...  
بالعكس والله حتى لو من ورا ضهرك هقولها ... بكرهك يا أخى ... مش  
معاملة يعنى"

نظر الزومى إلى القط قبل أن يسرع ليحتضنه بعنف: "أبو القطايط  
... واحشنى أوى والله"

خمشه القط فى وجهه وهو يدفعه بعيداً ويتملص من قبضته ليقفز  
بعيداً وهو يقول: "ابعد عنى ... ريحك تقرف"

"آه ما أنا كنت نايم فى الزبالة"

أجابه المساعد: "دا إيه الفخر اللى إنت فيه ده ... إنت كنت نايم فى  
الفور سيزون يعنى؟"

أجابه الزومى بسرعة: "إنت مش فاهم ... أنا هحكيلك الحكاية من  
الأول ... كان يا ما كان فى سالف العصر والأوان ..."

قاطعه الساحر: "انجز ..."

"زماااااااااااااااا وأنا صغير كنت فى كلية الزوميز للشرطة وكان أخويا  
الصغير معايا وبعدين كان فيه تاجر مخدرات مشهور أخوه راجع من شرم  
بالعربية إتليخ لما شاف الكمين اللى أخويا واقف عليه فحصلت حادثة  
وأخويا مات وبعدين ...."

"دى المصلحة"

"لا دى قصة حياتى"

"دا فيلم المصلحة"

"إنت شفته؟؟"

لم يرد عليه الساحر وإنما حاول أن يصفعه فتفادها الزومبي وهو يقول: "لا يا حبيبي أنا خلاص معتش هتضرب على قفايا ... الزمن ده خلاص انتهى ..."

قبل أن يستكمل جملته صفعه الساحر على وجهه فصمت وهو يقول: "تسلم إيدك يا سيد السحرة"

تنحى الزومبي وظهر على وجهه الحرج وهو يقول: "أنا لما مت رجعت العالم الآخر بتاعنا واكتشفت هناك اكتشاف مهم جدًا ... إني لو مت هنا فى الأرض مش هموت هناك وإنما هرجع هناك عشان أموت نهائياً لازم أموت فى العالم الآخر ... وبدأت أدور على شغل لكن الظروف كلها وقفت ضدى والعيال الصغيرة سموني عبيط القرية وكل ما يشوفونى يجروا ورايا ومعاهم عصيان ... فى الأول كنت مفكرهم هيضربونى بها بس بعد كده اكتشفت اكتشاف خلانى أجرى من أدامهم بسرعة الصاروخ ... العصيان دى مكانتش للضرب وبالتالي لما طردونى من القرية ملقيتش مكان أنام فيه إلا مقلب الزبالة ... تخيل ... حاجة مهينة جداً"

قاطع الساحر: "وانت هنا كنت سفير مصر فى الجابون؟ ... دا إنت كنت مسخة ... خلص أنا دورى هيبجى إمتى ... عاوز أعرف إنت جيتلى إزاي؟"

"فى يوم لقيت هالة إفتحت فى السما ... فى الأول كنت فاكرها هالة سرحان أو هالة فاخر بس بعدين ...."

قاطع القط: "لا هتزر وهنقضها كوميديا وكده قولى أمشى أنا ... أنا صاحب مرض وفروى بيقع ومش حملك"

استكمل الزومى حديثه: "المهم بعد ما الهالة إتفتحت بدأت تشد زومى من أقوى الزوميين ... زومى كان قوى وشرس وقلبه إسود ... بدأ يقاوم ومكانش عاوز ييجى ... قربت من الهالة وبدأت أشوف مقاومته وبعد شوية بدأ يهدى وعينيه لمعت وقال بصوت جهورى ... سأتى"

نظر للساحر وهو يقول: "عارف يعنى إيه سأتى؟؟"

ظهرت الحيرة على وجه الساحر فالكلمة واضحة لا تحتاج لتفسير قبل أن يجيب الزومى بهستيريا: "سأتى اللى بيصلح الساعات"

أخيراً تحدث القط وهو يقول: "مش لاقى طريقة نصرفه بيها فى الكتاب ده ... بس فى طريقة مضمونة ننفيه بيها مشتول السوق ... نجرها؟"

نظر له الزومى قبل أن يقول: "كتاب إيه ده؟ الأضواء؟؟ ... طب اقله بقى أحسن فاتورة الكهرياء تيجى غالية"

صفعه الساحر على وجهه ليصمت قبل أن يقول: "على فكرة مش العيال الصغيرة بس اللى معاها عصيان ... زومى قوى جداً وشرس ووافق ييجى ... إنت بتعمل إيه هنا؟"

"بتكلم معاك"

"مقصدش دلوقت يا آخرة صبرى ... أبوس إيدك أنا حاسس إنى هركب دعامة على إيدك قريب ... بتعمل إيه هنا؟"

أجاب الزومى بفرح: "طب لما تركبها ما تنساش تاخذ الأجرة منها"

صفعه الساحر على وجهه مرة أخرى فصمت وهو يستكمل: "يعنى إنت يهون عليك ألاقى زومى غريب داخل عليك؟"

"يعنى هو هيدخل عليا دخلة بلدى ... ما تسيبه فى حاله"

"مهانش عليا ... زقيته فى آخر لحظة وجيتلك أنا هنا"

"يا فرحتى بيك والله"

قبل أن يستكملوا كلامهم طرق الباب عدة طرقات وظهر الفامباير على الباب وهو يقول دون أن يرى الزومى: "حاجة مهمة جداً حصلت لازم تعرفها ... وحالاً"

نظر الساحر ماهر لمساعده وهو يقول: "فاضل آخر خطوة ونحضر الجن مرزوق تانى ... ركز بقى وافهم إن ده جن كافر ... أى ذكر لاسم الله بيتحرق"

هز المساعد رأسه قبل أن ينهمك الساحر فى تحضيره، دقائق وامتلأت الغرفة بالدخان الكثيف وظهر الجن مرزوق وهو يمस्क بسيجارة وينفث دخانها فى وجه المساعد قائلاً: "حاول تتجنبنى الفترة الجاية ... أنا هسامحك بس عشانك غي"

هز المساعد رأسه بصمت وهو يشعر بالخوف قبل أن تختفى السيجارة من يد الجن وهو يقول: "حظكم حلو إنى عرفت حاجات مهمة قبل ما أتحرق ... عندى ليكم خبر جحيم"

ابتسم الجن وهما يراقباه بصمت للحظات قبل أن يقول: "ما أخدمتوش بالكم من حاجة ... الخبر جحيم عشان أنا جن"

نظرا له باشمئزاز قبل أن يصمت وهو يقول: "أنا آسف ... مكنتش أقصد ... المهم ... الساحر زميلك حضر عضوين جداد وهيتحركوا لمكان جديد ... عارف ده معناه إيه؟"

نظر الساحر ومساعده لبعضهما البعض قبل أن يقول الجن وهو ينفجر ضاحكاً: "هيعمل عملية نقل أعضاء"

نظر له الساحر ومساعده بصمت قبل أن يقول: "عشان هما أعضاء الفريق وينقلهم من مكان لمكان فيبقى عمل عمل... أنا آسف تانى"

استكمل حديثه الجاد: "المهم إنه جاب عضوين جداد بس لما الغى ده حرقنى معرفتش هما مين... بس إحنا لازم نتحرك وراهم دلوقت عشان شبكة الاتصالات اللى أنا عاملها ما تتقطعش"

ظهرت الجدية على وجه المساعد وهو يقول: "ولو إتقطعت شبكة الاتصالات نجيب أورانج... منها شبكة محمول ومنها عصير فريش"

ضحك الجن والمساعد قبل أن ينظر لهما الساحر بغضب فصمتا وهو يقول: "يلا بينا نتحرك عشان ما نتأخرش"

تحدث المساعد: "إتحركوا أنتم وأنا إن شاء ال..."

صرخ به الساحر: "حاسب... إنت غى!... ما قلنا كده هتحرقه"

تدارك المساعد خطأه وهو يقول: "أنا آسف... ما قصدتش"

تنفس الساحر الصعداء وهو يقول: "الحمد لله إنى لحقتك"

احترق الجن مرزوق واختفى وهو ينظر لهما بغضب قبل أن يبتلعا ريقهما بصمت وهما ينظران لبعضهما البعض فى خوف

\*\*\*

خرج الفامباير من الغرفة وقبل أن يخرج له الساحر ومساعده والقط أوقفهم الزومى بإشارة من يده وطلب أن يخرج هو فى البداية

ليفاجئ زملائه بعودته، فتح الباب ووقف أمامهم وهو يقول بصوتٍ عالٍ:  
"أنا جيت"

نظر له الجميع بصمت لعدة دقائق قبل أن يقول المذؤوب للساحر:  
"دا العضو الأخير؟"

بلغ الساحر ريقه دون أن يرد، لحظات أخرى مرت قبل أن تصرخ  
مديحة بصوتٍ عالٍ وهي تعدو نحوه في سرعة، لم تر القط الذي داست  
في بطنه وهي تركض ليختل توازنها وتقع هي والزومبي أرضاً وهي تحتضنه،  
نظر الفامباير ليرى مديحة والزومبي أرضاً وهي تحتضنه بشدة فدمعت  
عيناه وقد حسب أنه تخلص منها فسجد أرضاً وهو يحمد الله ويقول  
بصوتٍ عالٍ: "الحمد والشكر ليك يا رب"

وقبل أن يرفع رأسه شعر بيد مديحة تمتد لتمسك بكتفه فاعتدل  
وهو ينظر جهة اليمين واليسار ويقول: "السلام عليكم ورحمة الله ...  
السلام عليكم ورحمة الله"

ثم نظر لمديحة قائلاً: "العصر كان هيفوتني بس قلت أخطفه"

وقف الزومبي يتأملهم بأعين تلمع بها شياطين السعادة وقلبه يدق  
في فرح قبل أن يقف بعينيه على رجل عجوز، كهل متهالك يجلس على  
أحد المقاعد ويبدو عليه التعب، يسعل في عنف ممسكاً بمنديل قماشى  
وبيده الأخرى عصا يستند عليها، تأمله الزومبي للحظات قبل أن يسأله:  
"إنت مين يا عم الحاج؟"

وقف العجوز وهو يعتدل، بظهر مفروود وأعين تلتمع ذكاءً قال: "شان ... جاكي شان"

مد يده للزومى الذى صافحه وهو يقول: "أومى ... الزومى"

صفعه الساحر على قفاه وهو يقول بغضب: "إرحمنى بقى"

نظر لجاكى شان وهو يصافحه ويسأله بود: "حضرتك جيت بسرعة يعنى؟"

ابتسم جاكى شان وهو يجيب سؤاله: "كنت بصور حاجة كده مع الحاج أحمد السبكي والأستاذة بدرية طلبية فى مدينة الإنتاج الإعلامى هنا ... فقلت أخطف رجلى يعنى ونيجى نقضى المصلحة على السخان"

تحدث المساعد وهو يقول: "على السخان! ... أخطف رجلى !! ... مصلحة! ... إنت من الدويقة يا حاج؟"

قبل أن يرد جاكى شان صاحت مديحة بفرحة وهى تقول: "أستاذ شاكى ... إنت مش هتتشقلب أو هتمشى على الحيط ... عاوزه أشوف الحركات الجهنمية بتاعتك"

نظر لها جاكى وهو يسأل الساحر باشمئزاز: "مين دى؟"

أجابت مديحة: "لا مؤاخذة ... مديحة لا مؤاخذة"

ضحك جاكى وهو يقول: "ولا مؤاخذة ليه يا بنتى هى حاجة عيب؟"

ضحك الجميع بسخرية فشعرت مديحة بالغضب، أخرجت المطواة من ملابسها وهي تضعها على رقبة جاكى الذى نظر للفامبير بفرع وهو يقول: "المغرب إذن ولا لأ ... عاوزين نخطفه جماعة"

تركته مديحة والقط يصعد على المنضدة ليصرخ فيهم: "اسمعونى يا غجر ... دلوقت الفريق اكتمل ... الزومى عضو قديم يعنى عارف هنعمل إيه كويس أوى"

نظر له الزومى وهو يهز رأسه بالإيجاب ويقول: "معنديش أى فكرة الحقيقية"

صفعه الساحر على قفاه فقال كأنه توصل لاكتشاف جديد: "أه ... هنسيطر على الأرض"

نظر القط إلى جاكى شان وهو يقول: "جاهز؟ ... إحنا هنبداً نتحرك دلوقت ... هنشرحلك كل حاجة فى الطريق"

هز جاكى رأسه وهو يقول: "هاخذ دوا القلب والضغط والسكر والمفاصل والروماتيزم وأبقى جاهز على طول ... إيدى ظرف 3 ساعات وأكون جاهز"

أمسك الزومى بظرف من أظرف الرسائل وأعطاه له بينما خلع الساحر ومساعدته والمندؤوب ساعاتهم وأعطوها له والمندؤوب يقول: "أدى الظرف وأدى ال 3 ساعات"

وضعهم جاكى فى جيبه وهو يقول: "يلا بينا"

تفادى الساحر ماهر ومساعده الغبي النظر في أعين الجن مرزوق بعد عودته مرة أخرى، كان الغضب يسطع في عينيه يكاد يحرقهما، كان كلاهما ينظر أرضًا بينما هو قد انتهى للتو من محاضرتة الغاضبة وطلب منهما بأدب للمرة الأخيرة ألا يتسبب أحدهما في حرقه ثانية

طلب منه الساحر ماهر ألا يضيع المزيد من الوقت وأن يحاول العودة إلى شبكته التخاطبية كي يعرف ما يحدث الآن في مقر قيادة الساحر الآخر، صمت الجن وهو يستدعي آلهة التركيز وبالفعل نجح في اختراق الشبكة التواصلية التي أنشأها الجن الأخرس ليستطيع التواصل مع باقي الفريق، لحظات مرت قبل أن يفتح عينيه والحيرة تبدو عليه، نظر للساحر متسائلًا قبل أن يقول: "أنا سامع حاجة غريبة جدًا، أنا سامع صوت جاكي شان!"

سأله الساحر وعينيه تلمع بذكاء: "عارف ده معناه إيه؟"

هز الجن رأسه إيجابًا وهو يبتسم بخبث ويقول: "عارف جدًا"

سأله الساحر وابتسامته تتسع: "مادام سامع صوت جاكي شان يبقى الفيلم الجديد بتاعه بدأ على MBC MAX وهما بيتفرجوا عليه حالاً"

هز الجن رأسه وهو يقول: "بتفكر في اللي بفكر فيه؟"

أجابه الساحر بسرعة: "طبعًا، إحنا لازم نجيب ريسيفر جديد حالًا  
عشان نلحق الفيلم من أوله"

فجأة صرخ بهم المساعد بصوتٍ عالٍ: "إيه؟؟ خلاص، اللا مبالاة  
سيطرت ... عدم الإحساس بالمسؤولية ساد عليكم، جرى إيه، هو دا  
التفكير السليم؟ ... هي دي الأفكار الكويصة"

نظر الاثنان أرضًا ونكسوا رؤوسهم قبل أن يقول الساحر بخجل: "أنا  
أسف ... إحنا فعلاً فكرنا غلط"

أجابه المساعد: "غلط جدًا ... إحنا نجيب ريسيفر جديد ليه والقديم  
جوا وشغال زى الفل"

صاح الساحر بصوتٍ عالٍ: "الله عليك ... إيه الدماغ دي ... ما شاء  
الله عليك يا ابنه..."

صمت الساحر للحظة قبل أن يسأل مساعده بصوت منخفض: "إيه  
... إتحرق ولا أسمى عليه؟"

هز المساعد رأسه وهو يقول: "لأ خلاص إتحرق"

ابتلع ريقه بصعوبة وهو يسأله: "عارف لما بييجى أول حاجة هيعملها  
إيه؟"

هز المساعد رأسه بالإيجاب وهو ينظر للأرض بخوف ... قبل أن يقول  
الساحر: "يبقى لازم أول حاجة نعملها نبدأ نختار أسامي للأطفال"

\*\*\*

جلس الجميع حول الساحر في شكل دائري بينما بدأ هو بالحديث:  
"إحنا المرة اللي فاتت فشلنا ... فشلنا عشان أيدينا مكانتش في أيدينا  
بعض"

رد الزومبي: "يا ريس الجو صيف وإيدينا بتعرق وفرهدة وكده"  
استدرك الساحر: "لأ مش قصدى ... يعنى كتفنا ما كانش في كتف  
بعض، ضهرنا ما كانش في ضهر بعض"  
سأل الزومبي مرة أخرى: "يعنى نقف جنب بعض ولا طابور ورا  
بعض عشان ننجح؟"

صمت الساحر للحظات قبل أن يقول: "واضح إنك جيت واني لازم  
أبدأ أنتقى ألفاظى كويس، طب قوموا شوية يا جماعة استريحوا وأنا  
والمساعد والقط هنبداً نحط الخطة الأخيرة"

لحظات مرت قبل أن يسمع الجميع صوت صرخات، التفت الجميع  
ليجدوا مديحة وهي تركض خلف الجن ممسكة بمطفأة حريق ضخمة  
تصوب خرطومها نحوه وتحاول أن تطفئ نيرانه، حاول الجميع أن  
يوقفوها إلا أن ضحكاتهما الهستيرية وصوتها الحاد وهي تصرخ أخاف  
الجميع، تقدم الفامباير وهو يجذبها من يدها ليجلسا في ركن هادئ قبل  
أن ينظر لعينيهما متجاهلاً حولها الواضح وهو يقول لها: "إيه بقى يا  
مديحة؟"

"إيه يا حبيب قلب مديحة"

"مش عاوزه تعقلى ليه بقى؟"

"إنت السبب"

"تقصدى من ساعة ما ضربتك بالخشبة فى دماغك؟"

"لا مش قصدى"

"أه ... تقصدى لما ناولتك بكوريك العربية فى قورتك؟"

"لا برضه مش كده ... إنت مش عاوز تحسسى بحبك ... مش عاوز تحسسى بأنوثتى"

"لا ما هى دى عاوزة معجزة ... أنوثة مين يا مديحة ... مش تحلقى شنبك الأول؟"

"يا راجل افهم ... أنا حلوة والله"

"أنا عارف إنك كنتى حلوة بس من ساعة ما الشباب ثبتوكى وشوهوا وشك وإنتى مش ..."

قاطعته سريعاً: "أنا محدش شوهنى؟"

أجاب بدهشة: "يعنى دا وشك الحقيقى؟"

فتحت مطواتها فى سرعة وهى تقول بغضب: "تقصد إيه؟"

أجاب بسرعة: "زى القمر يا حبيبتى ... زى القمر"

أغلقت المطواة وهى تقوللله: "هتروح من ربنا فىن بكذبك ده"

بينما كان الزومبى يتأمل جاكى شان عن قرب وهو يلمسه ليتأكد أنه حقيقى، شعر جاكى شان بالملل فأشار للساحر الذى ناداه، وقف الزومبى

أما الساحر الذى أخرج من جيبه نقود وهو يقول: "هتنزل تجيبلنا أكل  
وبيبسى وربع سوشى مشكل عشان الحاج جاكى وعلبتين مناديل سوفت  
روزمن الكبيرة"

تساءل الزومى: "مناديل إيه؟"

"سوفت روز"

"والله ما سوفت حد"

فتح الساحر الباب وهو يركله بقدمه ويغلق الباب خلفه ويسبه فى  
سرّه، كان المذوّوب والجن ملتفين حول لعبة يلعبونها فى تركيز قبل أن  
يصيح المذوّوب بصوتٍ عالٍ: "الملك كش"

أجابه الزومى من خلف الباب المغلق: "ليه إنت غسلته بمية  
ساقعة؟؟"

تجاهلها الجميع بينما اقترب القط منهم وهو يقول: "مبدأيًا عشان  
محدث يزعل منى اسمها كش ملك، دا أولًا ... ثانيًا وده الأهم دى اسمها  
طاولة ... مفيش شطرنج بزهر"

نظر الجن للغامبير وهو يفكر: "طاولة إيه وشطرنج إيه؟ ... هى دى  
مش كوتشينة؟"

فتح الزومى الباب ودخل فى اللحظة التى وقف فيها الساحر وهو  
يصيح بحماس: "أخيرًا قربت أخلص الخطة ... خلاص لازم تستعدوا ...  
الخطوة الجاية هنروح وسط خفافيش الظلام"

أجاب الزومى بفرح: "هنروح للأستاذ بات مان؟"

جلس الساحر ومساعده أمام الجن مرزوق الذى عاد للمرة الألف تقريباً وهو يقول بصوتٍ عالٍ: "أغبياء ... أنتم الإثنين أغبياء ... إزاي ساحر كبير كده والمساعد بتاعه مش عارفين إني بتحرق من حاجات معينة"

أجابه المساعد: "طب ما إنت ممكن تكتبلنا الحاجات اللى بتحرقك فى ورقة وإحنا ناخد بالننا منها بعد كده"

نظر الجن أرضاً وهو يقول بياس: "هكتهم إزاي وأنا بتحرق منهم يا غي"

قرر الساحر أن يتدخل أخيراً وهو يقول: "طب قولهم لينا وإحنا هنحفظهم"

شعر الجن بالياس يحتل صدره فقال صارخاً: "طب أقرأ المعوذتين أحرق نفسى دلوقت طيب ولا أعمل إيه؟"

صمت الاثنان وهما يشعران بالخجل، لحظات مرت قبل أن يقول الجن: "أنا لازم أتصرف ... أنا لو فضلت هنا مش هنتقدم خطوة ... لازم أتصرف أنا"

نظر له الساحر وهو يقول: "هتعمل إيه؟؟"

ظهر الاهتمام على وجه الجن وهو يقول: "ما أنا لو قعدت جنبك إنت والغبي التانى ده مش هعرف أحكم سيطرتى على شبكة الاتصال، لازم

أتصرف، لازم أوصل لطريقة تخلينى دايمًا فى قلب الحدث. فى وسط النار، لازم أشوف طريقة تخلينى على اتصال مباشر بيهم"

صمت قليلاً قبل أن يقول: "لقيتها، هغيب شوية وأرجعلكم، مش هتأخر"

اختفى الجن من أمامهم فجأة قبل أن ينظر الساحر لمساعدته وهو يقول: "لازم نركز شوية، أنا زعلان من اللى حصل"

أجاب المساعد والحزن يغزو صوته: "أنا كمان متضايق، مشى من غير ما نحرقه"

نظر له الساحر بياس وهو يكاد يبكى ويقول: "مفيش فائدة"

\*\*\*

سمع الجميع صوت الباب، حاول الجنى أن يتحرك ليفتحه إلا أن نظرة صارمة من مديحة التى تمسك بمقالة وتستمتع بطهو بعض البيض على النيران الهادئة المشتعلة من الجنى الذى يقف بدون حراك وكأنه يخشاها، فتح المذؤوب الباب فوجد شخص ملتجى يلبس جلبابًا قصيرًا وحذاءً جلدًا مفتوحًا يقف أمام الباب غاضبًا نظره وهو يمسك بمسبحة فى يده ومهمك فى التسبيح، شعر الشيخ بانفتاح الباب فقال وهو لا يزال ينظر أرضًا: "السلام عليكم ورحمة الله وبركاته"

ابتسم المذؤوب وهو ينظر للفاмир الذى شعر بالقلق من ابتسامته الخبيثة فتساءل بحيرة: "مين اللى على الباب؟"

لمعت عينا المذؤوب بفرح وهو يقول: "المأذون يا معلم"

قفز الفامباير واقفًا على قدميه فجأة وهو يسأل: "إيه؟"

قبل أن يقرر وعيه أنه لن يستطيع تحمل هذه الصدمة فخر مغشيًا عليه فورًا بينما مديحة تقافزت فرحة وقطرات من الزيت المغلى تتطاير من مقلاتها لتحرق الآخرين، ترك المذؤوب والقط الباب مفتوحًا وهرعوا لإفاقة الفامباير الذى رفض كل الوسائل المعروفة لاسترداد الوعي، وقفت مديحة فى منتصف لغرفة وهى تقول: "يا سى الفامباير"

كانت ترددات صوتها الشيء الوحيد القادر على إعادته لوعيه مرة أخرى ففتح عينيه ببطء وهو يراقب عينها والغضب الذى يستعربها وهى تقول: "وهما لما يقولوك المأذون جه ... يغمى عليك؟"

فكر قليلاً قبل أن تدمع عيناه ويشعر باليأس يقترب قبل أن يقترب منه القط وهو يقول بصوت خافت: "القصاص"

تعجب الفامباير ونظر له بدهشة قبل أن يستدرك القط وهو يقول: "أسف ... الفرحة"

رقصت الفرحة فى عيني الفامباير وقد وجد الحل: "من الفرحة يا قلبى ... أغمى عليا من الفرحة مش أكثر"

انصرفت مديحة غير مقتنعة بينما نظر الفامباير للقط نظرة تحمل أسمى معانى الشكر والامتنان، رد عليه القط بصوت صادق: "كلنا بناكل عيش هنا يا فامبير ... إحنا غلابة والله"

تذكر الجميع أخيرًا أن هناك شخص ما يقف على الباب فعادوا للباب جميعًا ليجدوه يقف كما تركوه، رفع عينيه أخيرًا ليجدهم يقفون أمامه جميعًا، دار بعينيه قليلاً ليجد الساحر فابتسم أخيرًا وهو يقول: "الأخ أبو السحرة ... لقد حضرت في الموعد"

ابتسم له الساحر وهو يشير لهم ليدخلوا إلى الشقة ليستطيع الرجل أن يدلّف للشقة. دخل الرجل الشقة وهو يتجول بنظره حتى اصطدمت عيناه بمديحة فنظر أرضًا وهو يقول: "امرأة سافرة"

ردت مديحة بسرعة: "ولا مسافرة ولا حاجة ... قاعدة على قلوبكم"

استدرك الرجل بسرعة وهو يقول: "أقصد متبرجة"

ردت مرة أخرى: "مش متبرجلة ... أنا حلوة أهو ومركزة"

هز الرجل رأسه يأسًا وقد شعر بالألم نتيجة غيابها، جلس أمام الساحر وهو يقول: "عرفني على الإخوة الكرام يا أخ ساحر"

ابتسم الساحر وهو يشير لهم واحدًا تلو الآخر: "الأخ مساعدى الأول، المذؤوب، الفامباير، الزومى، الجن، جاكى شان، قط منزلى أليف ومديحة الفاضلة"

نظر الرجل لهم قبل أن يسأل: "هل لى أن أسأل عن عجب خلقتهم وتغير ملامحهم؟"

ارتبك الجميع قبل أن يجيبه جاكى شان سريعًا: "لا أبدًا دا إحنا بنصور فيلم إن شاء الله وبحمده"

نظر له القط وهو يقول: "بتقول إيه؟"

أجابه جاكى شان: "ما تركزش هما بيحبوا الحاجات دى"

أجاب الرجل: "بالتوفيق يا شباب المهم أن يكون فيلمًا هادفًا يفيد المجتمع"

ابتسم الساحر وهو يقول: "إن شاء الله، أنا عاوزك فى حاجة مهمة أوى"

نظر الرجل بطرف عينه قبل أن يقول: "لا أشعر بالراحة فى وجودها، إما أن تغطى رأسها أو تترك الغرفة أو أترك أنا البيت كله"

نظر الساحر لمديحة وهو يقول: "اقعدى إنتى فى الغرفة اللى هناك يا مديحة ولما نخلص هنحكملك"

نظرت له مديحة بدهشة وهى تقول: "أنا! ... بتطردنى من المكان عشان الشيخ؟ ... أنا عضو أساسى من أعضاء الفريق، أنا عماد حمدى من أعمدة الخطة ... أنا ...."

قاطعها الساحر بصرامة: "إطلعى برا ... إنتى فاشلة ... جاية معانا بالعافية ... محدش طايقك ... بوظتى خطتنا أول مرة وكنتى سبب فى موت واحد مننا وقلة تركيز التانى ... عاوزة مننا إيه بقى يا شيخة ما تسببينا فى حالنا"

شعرت مديحة بالصدمة مما تسمع ودارت بأعينها فى سرعة على وجوه الفريق تنتظر أن يدافع عنها أحد إلا أن الصمت هو الذى سيطر،

شعرت بالدموع الساخنة تملأ عيناها قبل أن تسيل على وجنتها وهي تسرع إلى الغرفة تشعر أن قلبها قد كسر، حتى الشخص الوحيد الذي سلمته قلبها لم يدافع عنها، صحيح أنه تسلمه قهراً لكن قلبها أمانة بين يديه، دخلت إلى الغرفة وأغلقت الباب خلفها وجلست تبكي وحيدة على الفراش وهي تشعر بالحنق يملأ قلبها وبمرارة الغضب تملأ فمها ولكنها لم تعرف أبداً أنها لم تكن وحيدة في الغرفة

تساقطت دموعها وارتفعت مرارة غضبها الذى سيطر عليها فشل تفكيرها ومرر حلقها بغصبة ألمتها نفسيًا، صحيح أنها دخيلة عليهم إلا أنها ساعدتهم

صحيح أنها لا تتذكر فيم ساعدتهم، إلا أنها أحببت الفامباير

صحيح أنها فرضت نفسها عليه إلا أنه سيتعود

شعرت بأنها لا تستطيع السيطرة على دموعها، مسحها بكم قميصها إلا أن شيئاً ما قد كسر بداخلها ولا علاج لكسر قلب امرأة مثل مديحة إلا بطبق من المحشى أو علبه من النوتيل. هي لا تعرف النوتيل لكنها تعرف جيداً أنه نوع من أنواع الشوكولاتة، هكذا قالوا لها وبالطبع صدقتهم، شعرت بيد حانية تمسك بكتفها، تمسك كتفها فتزيل توتر الأيام وقهر الحزن، مدت يدها لتمسك باليد التى تمشى على كتفها ولكن اليد سُحبت بسرعة قبل أن تسمع شخصاً ما يتقياً اشمزازًا، التفتت لتجده شاب وسيم حسن الخلقة يشبه فتیان الأحلام، يبتسم لها برقة وهو ينظر لها بعينين ذاب فيهما الشوق ذوبًا، لم تسأله من هو وإنما جرت عليه بسرعة كي تحتضنه، حاول المسكين أن يتفادها إلا أنها كانت كموجة من موجات إعصار تسونامى التى اقتلعتة من مكانه لتصدمه بالحائط بقوة كانت كفيلة أن تكسر ستة من ضلوعه أو تصيبه بتشوه دائم فى عموده الفقرى قبل أن تسأله : "أنت مين يا واد يا اللى اسم النبی حارصك وصاينك وحاميك؟"

أجابها بابتسامة وهو يجلس على الفراش: "أنا الجن مرزوق، عاوزك في حاجة مهمة"

جلست بجواره وهي تتحسسه وتقول: "دا أنا اللي عاوزاك في حاجة مهمة أوى"

شعر بالخوف يتسلل لقلبه فقال بصوتٍ خافت: "سيطرى على هرموناتك يا مديحة بس واسمعي"

أجابته مديحة بهيستيريا ضحك: "إسماعيني وزمالك"

صمت قليلاً قبل أن يبصق في وجهها وهو يقول: "بطلى كلام ... خالص وركزى معايا شوية"

ظهر الخجل على وجهها وهي تقول: "أنا آسفة"

بدأ يتكلم بجدية شديدة وبصوت خافت: "زى ما إنتى عارفة إن الساحر بتاعكم بيحاول يسيطر على كوكب الأرض، في فريق تانى بساحر تانى أقوى بيحاول نفس الموضوع، الفرق إن الفريق بتاعنا عدد أفراداه أقل يعنى ده هيعنى بالنسبة ليكى مُلك أكبر وسيطرة أكبر ونفوذ أعلى، مش بس كده يا مديحة في الفريق بتاعنا هنقدرك، لا هتحسى إنك فاضة نفسك ولا إنك عضو غير مرغوب فيه"

صمتت مديحة للحظة قبل أن تظهر الجدية على وجهها: "مش فاهمة؟"

"إحنا محتاجينك معانا فى الفريق يا مديحة، هنقدر نستفيد منك، فى المقابل هنوفرلك حاجات كتير مكنتيش تحلمى بيها، فلوس مالهاش عدد، خدم مالهمش حصر، أملاك مالهاش مثيل، راحة مالهاش زى، نفوذ وعز وثروة، كل حاجة بتحلمى بيها هتلاقها عندنا"

"هتدوني فلوس؟"

"هنديكى اللى تؤمرى بيه"

"أنا عاوزه ثلاثة وعشرين جنيهه"

"هنديكى ثلاثة وعشرين جنيهه"

"طب والمقابل؟"

"محتاجين منك كل الأسرار اللى تقدرى عليها، محتاجين نعرف كل خطوة هياخدوها، كل فكرة فكروا فيها ونفذوها، كل فكرة فكروا فيها ولسه ما نفذوهاش، كل فكرة فكروا بيها بس ..."

"كل فكرة ما فكروش فيها"

"ولما هما ما فكروش فيها ... إنتى هتعرفيها منين يا مديحة؟"

"أنا قلت أجدود يعنى"

"ما تفكريش تانى ... أنا محتاج أعرف الخطوة قبل ما يخطوها ... الفكرة قبل ما ينفذوها ... محتاج دايمًا أكون سابقهم بخطوة"

"بس إنت كده بتطلب منى إنى أكون خاينة، أخون الفريق اللى كنت معاهم عيش وملح وشاورما سورى وتومية"

"الفريق ... الفريق اللى سايبينك لوحك تعيطى وما هانش على واحد فيهم يدخل عليكى بفضوة مطبخ يمسح بيها دموعك ... اللى قالوك إنك دخيلة عليهم وفارضة نفسك عليهم ... الفريق اللى بيتفقوا على كل حاجة برا وسايبينك هنا لوحك ومحدث سائل فيكى ... هو ده الفريق اللى باقية عليه"

صممت مديحة للحظات قبل أن تقول وهى تحاول حسم قرارها:  
"طب مين أعضاء الفريق التانى ده؟"

عضت على شفتها وهى تقول: "وكلمهم حلوين وزى القمرزك كده؟"  
"إهدى يا مديحة شوية من فضلك ... أولًا ده مش شكلى الحقيقى، أنا جن زى اللى قاعد برا وهوريكى شكلى الحقيقى"

بدأ شكله يتغير وملامحه الحسنة تذوب وسط قبح الحقيقة، استمرت عملية التحول لفترة قبل أن يظهر لها بشكله الحقيقى وهو يقول: "دلوقت محدش يقدر يشوفنى ولا يسمعنى غيرك"

"عشانك جن يعنى؟"

"جن إيه؟؟ لا طبعًا ... عشان أنا واقف متدارى ورا الباب وموطى صوتى جدًا"

"إنت لو ترجع بشكلك التانى ده، أنا عندى استعداد أسيب الفامباير  
واتجوزك بس إنت أشر"

"أقشرايه بس يا مديحة ... هو جمبرى، ما تركزى"

"طب أنا محتاجة وقت أفكر"

"هو أنا جايبلك عريس؟؟ ... مفيش وقت لازم تاخدى قرارك"

صممت للحظات تحاول المفاضلة بين الأمرين، الفريق الذى بدأت  
معه مهمتها، حلمهم الذى لم ولن يتحقق سوى بالاتحاد، الاتحاد وحده  
وبين الوعود التى قدمها لها الجن مرزوق، وعود جميلة ملونة بلون الأمل  
برائحة الحياة التى تمنتها، هل تبيع حلمهم وتخون الفريق وتختار راحتها  
النفسية أم تخون نفسها لتستمر مع فريق رفع شعار الفشل؟

فكرت فى عدد المرات التى سبوها فيها أو أجهضوا حلم حلمته أو  
فكرة اقترحها ليواروها تراب السخرية، كم مرة حلمت معهم حلمًا جميلًا  
قبل أن يتجاهلوه فى قسوة أمام عينها، ها هى الآن مع أحلام ووعود مزينة  
منمقة، لمعت عيناها بشدة وهى تتخذ قرارها، مدت يدها لتصافح الجن  
مرزوق الذى ابتسم بشدة وهو يصافحها

وفجأة سمعت صوت طرقة متعجلة على الباب وفُتح الباب بلا  
مقدمات

نظرت مديحة للجن مرزوق بفرع قبل أن تنظر للزومى الذى فتح باب الغرفة ولكنه لا يزال ينظر للخارج، يبدو أنه يرد على شخص ما يخطبه، تجاهلت نظرة الثقة وابتسامة اليقين الذين ظهروا على وجه الجن وهى تفكر فى حل سريع لإخفائه فلم يهدمها ذهنها إلا لحل وحيد، ابتلعت ريقها وهى تقول بسرعة وبصوت عالٍ: "أشهد أن لا إله إلا الله وأن محمد رسول الله"

اختفى من أمامها الجن ولكنها رأت نظرتة الغاضبة وهو يحترق بينما نظر لها الزومى بدهشة وهو يقول: "إنتِ أشهرتى إسلامك أخيراً؟" ابتلعت ريقها فى صمت وهى تتظاهر بالغضب والحزن وتسأله: "عاوز إيه؟"

تظاهر هو بالبأس وخشن صوته وهو يقول بلهجة البلطجية: "المعلم ساحر عاوزك برة ولما المعلم ساحر يقول عاوزك ببق....."

لم تعطه الفرصة ليستكمل حديثه وعالجته بصفعة نزلت على قفاه لتذكره بذكريات تمنى لو أنه ينساها قبل أن يقول: "ما يعوز ... هو هيقرفنا!"

قامت من مكانها ليبتعد هو خوفاً قبل أن يسير خلفها وهى تسير بثقة لا يشوبها سوى عرج بسيط اغتصب إحدى قدميها بدون سبب واضح اللهم إلا أن يزيدا قبحاً فوق قبحها، هرشت رأسها قبل أن تجلس على

المنضدة وهي تجول بنظرها عليهم جميعًا قبل أن تثبت أنظارها على الشيخ وهي تقول: "نعم؟"

تجاهل الساحر نبرتها الحادة وهو يقول لها بابتسامة محاولاً تلطيف الأجواء: "الشيخ رمضان عنده حاجة عاوز يقولهالك"

بفزع صاح الشيخ رمضان: "وعهد الله ما حصل ... دا أنا حتى أخرس"

صاح به الساحر يأمره ألا يخاف: "ما تتكلم، إنت إيه؟؟ ... القطة كلت لسانك"

انتفض القط وهو يقول: "والمصحف ما قربتله!"

قام جاكى شان مستنداً على عصاه وهو يخرج شريط من الحبوب من جيبه ويبتلع حبتان منه وهو يحاول التحدث بصوتٍ مرتعش: "بصى يا ست الكل، الساحر قرر إن رحلتنا الجاية لداعش ... عارفاهم؟"

اتسعت عينا مديحة وهي تهز رأسها بهدوء قبل أن يستكمل جاكى شان حديثه: "زى ما إنتى عارفة إنهم مسيطرين على أماكن كثير فى الوطن العربى وحتى الآن مظهرش جيش أو حكومة أو دولة مهما بلغت قوتها قدرت تتعامل معاهم، إحنا هنروح لهم بحجة إننا هننضم لهم ولكن إحنا رايعين نتعلم أسرارهم ولو عرفنا نجندهم معنا يبقى تمام جداً"

تسلم الجن دفعة الحديث وهو يقول برسالة تخاطبية: "المفرض إنى أنقلكم لكن للأسف أنا مش عارف المكان فالشيخ رمضان هو اللى هيوافر لينا طريقة النقل لهنالك"

تحدث المذؤوب: "هنروح مكان محدش يعرفه إلا الشيخ رمضان، هناك لازم نتصرف ... نحى نفسنا من الموت ومن كل حاجة لحد ما نوصلهم"

تسلم القط الأمر من هنا: "لازم ساعتها نقدر نقنعهم إننا عاوزين ننضم لهم"

تحدث مساعد الساحر: "الموضوع مش بسيط خالص، الموضوع نظريًا صعب، عمليًا شبه مستحيل"

جاء دور الفامباير فى الحديث: "المرة دى المهمة مش سهلة ومفيش مجال للخطأ"

الآن دور الزومبى الذى سحب نفس عميق قبل أن يقول: "بس" صممت مديحة لوهلة كأنها تستوعب الكلام قبل أن تسأل: "طب وهنروح إزاي ... المكان والشيخ رمضان عارفه، الطريقة بقى؟" لمعت عينا الشيخ رمضان وهو يقول بحماس: "أنا عندى فكرة جهنمية"

تعلقت به أعين الجميع بلهفة

\*\*\*

"ها إيه رأيكم بقى فى الفكرة دى؟"

نظر له الساحر بدهشة وهو يقول: "هو إنت إتكلمت؟؟ إنت سحبت نفس عميق وسرحت فى الحيلة دقيقتين وبعدين سألتنا!"

أجابه رمضان: "آه ما إنتم المفروض تعرفوا! ... أنا بشوفهم بيعملوا كده في الأفلام"

نظر المذئوب للسامير وهو يقول: "النسخة المذكر من مديحة، تخيل إنت إن الصنف ده بيتكاثر ودب الباندا قرب ينقرض، متخيل بؤس الكوكب ده!"

صاح بهم الساحر وهو يصيح برمضان أيضًا: "ملكش دعوة بالأفلام، قول فكرتك عادى جدًا"

تململ رمضان في جلسته وهو يبدأ شرح فكرته: "إحنا هنخرجكم من البلد في توابيت، كأنكم مسوخ لعبة أو أزياء يعنى كانت في تصوير فيلم" رفع الساحر حاجبيه إعجابًا وهو يقول: "والله فكرة"

أجابه الزومبي بسرعة: "أيوا ما إحنا عارفين إنها فكرة ... هو حد قالك إنها طيارة"

صفعه الساحر على قفاه فقال الزومبي سريعًا: "آه والله فكرة" ابتسم الساحر وهو يسأل رمضان: "طب والجمارك والمطار والحاجات دي"

أجابه رمضان وهو يخرج محقن وأنبوب به منوم وهو يبتسم بلطف: "رجالتنا في كل حته ... ما تقلقش"

أمسك بيد الساحر باحثًا عن وريد قبل أن يحقنه، شعر الساحر بالعالم يدور من حوله قبل أن يشعر بثقل في عينيه لم يملك معه إلا استسلامًا، ترك عينيه تغلق ببطء وهو يرى ابتسامة رمضان تتسع ويسمع صوته يأتي خافتًا كأنه من عالم آخر: "ما تقلقش"

فتح الساحر عينيه ببطء وهو يشعر بالإرهاق، تأمل الشمس الساطعة من فوقه قبل أن يحرك يده ليشعر بسخونة الرمال من تحته،  
رمال!

أين هو؟، حاول الاعتدال رغم الإرهاق والصداع الذى هاجم رأسه وهو يتأمل الصحراء من حوله، كان فاقداً للوعى فى صحراء جرداء ليس بها أى ملامح للحياة، وقف رغم ترنحه يراقب الرمال الصفراء التى تفرش الأرض أمامهم فى طريقٍ واحدٍ شمل كل الاتجاهات، طريق لموت بدأ يدور حوله ببطء وهو يرى من بعيد جنثاً مسجاة أرضاً، بدأ يتحرك نحوها ليجد فريقه ملقى، أسرع يكافح بقدميه نعومة الرمال وهو يهبط على أقربهم له، تأمل وجه المذؤوب الفاقد للوعى وهو يتفحص نبضه وتنفسه، زفر بارتياح وهو يحاول إعادته لوعيه، قام المذؤوب وهو يتأمل المكان من حوله بحيرة إلى أن وقعت عيناه على ساحره فابتسم بلطف قبل أن ينعقد حاجباه بألم وهو يسأله: "إحنا فين؟"

أجابه الساحر وهو يتأمل جاكى شان الملقى على وجهه: "مش عارف، أنا قمت لقيت نفسى هنا ... ساعدنى نفوق بقية الفريق"

تحرك المذؤوب تجاه مساعد الساحر وهو يفيقه ويطمأنه ويمده بأخر المعلومات التى وصلوا لها قبل أن يكتمل نصاب الفريق بين مترنحين ومرهقين، وقف الساحر أمامهم يتأملهم ها هو الجن يحاول أن يعيد نيرانه لتوهجها الطبيعى بينما القط مشغول بلعق نفسه لتنظيف جسده من

الرمال، جاكى شان يستند على عكازه وهو يحاول نفض الرمال عن  
ملابسه والمساعد والمذؤوب مشغولان كلاً منهما بتنظيف ملابس الآخر في  
حماس يحسدان عليه، بحث بعينه عن الزومى والفامباير ومديحة فلم  
يجد لهم أثراً، شعر بالفزع، ترى هل واجهوا مشكلة في الانتقال إلى هنا، مد  
يده في جيبه فوجد ورقة تشرح له أنهم الآن على حدود داعش أو ما يسمى  
بالدولة الإسلامية

وضع الورقة مرة أخرى في جيبه وهو ينظر لفريقه المشتت بين  
مواجهة الصداق وبين محاولة الوقوف على الرمال الساخنة بلا ألم،  
بصوت عالٍ جذب انتباههم إليه وهو يقول: "مديحة والفامباير والزومى  
مش موجودين، لازم نلاقهم حالاً قبل ما تحصلهم أى حاجة وكمان قبل  
الشمس ما تغيب، إحنا مش عارفين إحنا فين ... مش عارفين إيه  
هيحصلهم لو ملقيناهمش، لازم نلاقهم قبل الليل ما يحضر"

هز الجميع رؤوسهم في موافقة وهم يشعرون بالقلق على زملائهم  
قبل أن يظهر الفزع على وجه المذؤوب وهو يتراجع خطوة للخلف، بدأت  
علامات الفزع تظهر على باقى الفريق وهم يتراجعون بعشوائية ورعب،  
ابتلع الساحر ريقه بصعوبة وهو ينظر خلفه ببطء محاولاً التمسك ليجد  
سيارة نصف نقل هبط من صندوقها أربع رجال ملتحين يرتدون الجلابيب  
البيضاء القصيرة ويحملون سلاحاً معلقاً خلف ظهورهم بينما هناك  
شخص غاضب يقف على صندوقها ممسكاً بمدفعاً رشاشاً مضاد  
للدبابات ويبدو على أهبة الاستعداد لمحوهم من خرائط الوجود، فتح بابى  
السيارة وهبط منها كهل يتمتع بصحة جيدة كان يجلس في مقعد السائق  
وشاب أبيض حسن الخلق ملتجئ يجلس بجواره، مشى الجميع نحوهم

قبل أن يقف الستة بجوار بعضهم البعض وهم يمسكون أسلحتهم ويجذبون أجزائها لتصعد الرصاصات إلى فوهات الأسلحة بينما انعقدت حواجب الرجال وعلامات الغضب تنحت ملامح القبح على وجوههم

\*\*\*

فتح الفامباير عينيه ببطء وهو يتأمل الشمس التي قاربت على الغروب قبل أن ينتفض جسده بعنف وهو يعتدل ليتذكر ما حدث، الشيخ رمضان حقن أعضاء الفريق بمنوم قوى قبل أن يسجهم في توابيت، في مطار القاهرة الدولي تم شحن التوابيت لطائرة متجهة إلى دولة قريبة جدًا من معاقل الدولة الإسلامية ومنها سيتم إلقائهم إلى الصحراء، بحث بعينيه عن باقي أعضاء الفريق إلا أن الرمال فقط واجهته. قبل أن يقرر أن يبدأ رحلة البحث عن رفقائه لمحها، مديحة بجواره فاقدة للوعي مغلوبة على أمرها لا حول لها ولا قوة بينما هو في كامل وعيه وكل تركيزه، هذه فرصة والفرصة لا تأتي إلا مرة واحدة في العمر ويجب عليه استغلالها قبل أن يندم وقت لا ينفع الندم. تحرك ببطء محافظًا على هدوئه كيلا تعود إلى وعيها بسبب حركته أو صوته فيعيش عمره بأكمله لا يسامح نفسه إلى أن رأى غايته، صخرة ضخمة تكفى لسحق رأسها وبدون أدنى مجهود

حمل الصخرة وهو يتوجه للمكان الذي ترقد فيه مديحة بلا حراك، وقف فوق رأسها وهو يرفع الصخرة عاليًا ويبتسم في شماته، أخيرًا سترحل من سببت له العذاب وأجبرته على زيجة لا يفتخر بها ولا رغبة له فيها. رفع صخرته عاليًا قبل أن تفتح مديحة عينها في سرعة وهي تتأمله،

شعر بارتباك وهو يقول لها: "أنا قلت يعنى أجيب الضل على وشك عشان  
تنامى براحتك، كده أحسن ولا أجيبها يمين شوية؟"

تأملته مديحة بدون رد بينما بدأ شعرها بالغضب فهامت شعيراته  
بعيداً عن وجهها كأنها تحاول الهرب بدورها بينما تأملت الصحراء من  
حولها وهي تسأله بصوت أجش: "إحنا فين؟"

تعجب من نبرة صوتها وهو يسألها: "إيه ده معلش؟"

"أنا صوتى يببقى كده لما أصحى من النوم"

"يعنى أنا أعرف الناس ببقى صوتها خشن أول ما تصحى، أجش  
شوية، لكن صوتك ببقى زى صوت الفنان غريب محمود أهى دى جديدة"  
حاولت أن تستعيد قليلاً من رقة صوتها الأثنوى وهي تقول: "إحنا  
فين؟"

"مش عارف أنا فقت لقيتني هنا أنا وانتى بس، متخيلة البؤس، حتى  
لما نتوه من بعض أنا وانتى مع بعض"

نظرت له مديحة بغضب فحاول أن يصلح موقفه: "أنا أقصد  
بؤسهم هم، إنما أنا! ... أنا أسعد واحد في الدنيا كلها"

تأملت مديحة الصحراء من حولها وهي تقول: "مش لازم نفضل  
مكاننا، لازم نتحرك ... الشمس فاضلها ساعات وتغيب ولو فضلنا هنا  
هنموت من البرد، لازم نلاقى حطة فيها ناس ينقذونا"

فكر الفامباير قليلاً قبل أن يجيبها: "أنا شايف إننا نفضل هنا عشان  
لو الفريق بيدور علينا منبقاش بنتحرك إحنا الإثنين عكس بعض"  
"لو فضلنا هنا والجو برّد هتضطر تحضننى عشان تدفينى"  
شعر الفامباير بالهلع وهو يقول: "لازم ندور عليهم ونبدأ حالاً ...  
فاهمة يعنى إيه حالاً"

نظر الساحر للرجال الذين يقتربون وعلى وجههم أعتى علامات التوعد، رجع عدة خطوات للخلف ووقف بجوار فريقه، على يمينه الجن وعن يساره المذؤوب بينما المساعد وجاكي شان والقط كانوا في الصف الثاني، نظر لهم الساحر وهو يقول: "إنتم مين وعاوزين مننا إيه؟"

لم يجيبه أحد ولم يبدو عليهم أصلاً أنهم سمعوا السؤال الموجه لهم، تقدم الكهل خطوة للأمام وهو يتأمل الفريق وكأنه يتعجب خلقهم بينما تراجع الساحر للخلف في تلقائية وتناسى أنه قائد الفريق، تأملهم القائد لوهلة قبل أن يضع سلاحه خلف ظهره وهو يبتسم بسخرية ويقول: "إنتم اللى مين وإيش بتعملوا هنا؟"

ابتسم مساعد الساحر وهو يقول: "إيش فينو"

نظر له الساحر بلوم وهو يقول: "يعنى دا وقته يا ابن الناس؟؟"

ابتسم القائد وهو يقول: "فينو ... حبيبي فينو"

نظر له الساحر بدهشة وهو يقول: "آه دا طلع عبيط هو كمان ... دى ليلة سودا باين"

فجأة ظهرت ملامح الجدية والغضب على وجه القائد وهو يقول: "هذى أراضي تابعة لسيطرة الدولة الإسلامية وتدنيسها يعنى شيء واحد فقط"

صمت الجميع منتظرًا استكماله لكلامه إلا أنه تابع النظر لهم بغضب قبل أن يصيح بصوتٍ عالٍ: "الموت للدخلاء"

تراجع الجميع بفرع قبل أن ينظر الساحر لجاكى شان وهو يقول: "اتصرف ... آمال أنا جايبك ليه؟"

رمى جاكى شان عصاه بعيدًا وهو يشد جسده، خلع قميصه وأظهر عضلاته وهو يحرك جسده فتقطع عظامه في صوتٍ كافٍ لبث الرهبة في قلوب الشجعان، لمعت عضلاته تحت الشمس وهو يتقدم من الجمع الذى تراجع للخلف أمام شجاعة وجسارة جاكى شان، وقف جاكى شان أمام الكهل قائدهم ونظرات التحدى تتلاقى في الأعين قبل أن يقول: "يعنى ينفع؟؟، هتمد إيدك على راجل كبير أد أبوك؟"

انكسر صوته وشابه بعض البكاء: "والله عيب، طيب اعمل اعتبار للشيبه وللسن، حرام عليكم يا ابنى والله ... دا أنا زى أبوك"

نظر له الكهل بإشفاق وهو يقول: "لا تخف، لن نؤذيكم يا شيخنا العزيز"

عاد جاكى شان للساحر بابتسامة وهو يقول: "خلاص، قالى لن نؤذيكم يا شيخ عبد العزيز"

رد الساحر: "بس إنت مش الشيخ عبد العزيز!"

"سيح بقى وافضحنا فى قلب المكان"

"سيح إيه بس وأنا جايبك عشان تتذلل للناس وتكسر نفسك؟"

"أكسر نفسى ... بتشتم راجل كبير أد أبوك وتحسسه بعجزه! ... دا بدل م تاخد بإيدى يا ابنى"

شعر الساحر بالخجل من نفسه وهو يربت على كتف جاكى شان برفق ويقول: "أنا أسف"

ضرب جاكى يده وهو يدفعه بغضب ويقول: "ما أهى شغالة أهى أمال قارفينا ليه بقى!!"

وقف جاكى بجوار الساحر وهو ينظر لقائد المجموعة الذى قال: "القرار فى الأخير مو لينا، نأخذكم للأمير وهو يقرر شو بده يعمل فيكم"

\*\*\*

عندما بدأ التعب يغزو أجسادهم وبدأت عضلات أقدامهما تتوتر من كثرة المشى ومن معاندة الرمال الزلقة وبدأت عصافير البطون تزقزق جوعاً باحثاً عن لقمة يسدون بها رمقهم، بدأت الأفكار الشريرة تغزو العقل نتيجة للإرهاق الشديد والمسوخ الشريرة تظهر نتيجة للهلاوس التى تعاون فى صنعها الجوع والإرهاق فخلقوها فى أحسن تقويم، فجأة سقطت مديحة أرضاً فشعر الفامباير بالفرح وكاد أن يحتفل فرحاً لولا أنه قرر أن يصبر قليلاً كيلا تكون خدعة ويقع فى شباك حيلها مرة أخرى، أسرع الخطى إليها ليجدها ساقطة أرضاً تلهث فى تعب وهى تقول له: "أنا تعبت" ابتسم لشعورها بالعجز وهو يقول: "وأنا الفامباير أهلاً وسهلاً"

صفعت يده بقوة وهى تحاول أن تقف لتمتص دمانه لولا أن تعيها حال بينها وبين القيام، فجأة سمعا صوت محركات تقترب منهما فى بطن،

سيارات دفع رباعي تقاوم الرمال والصخور وتشق طريقها كالذئاب الجوعى وأخيراً على مرمى البصر ظهر كشافاً ضوء يقتربان في سرعة، تراجع الفامباير للخلف في هلع يبحث في الصحراء عن أى شيء يختبئ خلفه إلا أنها استسلمت لإغواء الشهوة فتعرت أمامه بالكامل مخفية من أى تضاريس يختفى خلفها فوقف عاجزاً كطفل يتعلم المشى تركته أمه، تراجع عدة خطوات للخلف بينما مديحة بدا وكأن القوة عرفت طريق جسدها مرة أخرى فهبت واقفة وهى تقول فى ذكاء: "أنا شفت المنظر ده فى فيلم قبل كده ... هقف فى النص بينهم عشان هيطلعوا موتوسكلين مش عربية"

وقفت مديحة فى المنتصف بينما اقترب الضوء بقوة لتصدمها السيارة وتقع مديحة أرضاً تتلوى من الألم بينما الفامباير يبتسم فى شماته وهو يراقب الملتحى الذى هبط من السيارة يحمل سيفاً صارماً وهو يصيح به: "ماذا تفعلون هنا ومن هذه السيدة؟"

أجابه الفامباير: "يعنى دا شكل واحدة يتقال عليها سيدة؟"

أمعن الملتحى النظر فى وجه مديحة بعض الوقت قبل أن يسأل: "عفواً، أقصد ما هذا الكائن؟"

وقفت مديحة تمسك بجانبها وهى تتألم وهى تقول: "مديحة لا مؤاخذه"

مد الرجل سيفه ليمنعها من الاقتراب وهو يقول: "الشيخ أبو فادى اللبناني"

قالت مديحة: "وأخبار فادى إيه والست أم فادى كويسة ... تلاقها  
ست طيبة ... ما سيماهم على وجوههم أهو ... شكلك راجل طيب و..."  
صاح بها الرجل بلهجة مصرية: "خلاص يامًا ... إنتى هتصاحيبنى؟"  
صاح به الفامباير بفرحة: "مصرى؟ منين من مصر؟"  
"عزبة الأهطل"  
"منين من عزبة الأهطل"  
"قرية صغيرة كده جنب ميت العبط اسمها ميت أبو مجنون"  
"منين من ميت أبو مجنون؟"  
"نجع المتخلف"  
"منين من نجع المتخلف؟"  
"كفر الهلول"  
"منين بالضبط من كفر الهلول؟"  
"من بعد كوبرى المعاقين ذهنيًا"  
"أجدع ناس والله"  
"الله يكرمك ... حضرتك منين بقى؟"  
"لا أنا مش مصرى!"

نظر له الشيخ بغضب وهو يرفع سلاحه عاليًا ويقول: "الموت لك  
ولكى أيضًا... سأعلمك ألا تغيرين في خلقة الله مرة أخرى"

رد الفامباير: "لا دى ملامحها كده طبيعى"

"بتهرج؟"

"بتكلم جد والله"

"لا إله إلا الله!"

"محمد رسول الله"

"ولا حول ولا قوة إلا بالله"

"والله أكبر كبيراً"

"وسبحان من له الدوام"

"ولا إله إلا الله"

"محمد رسول الله"

صاحت بهما مديحة: "بس إنتم الإثنين ... إيه وقعت فى إثنين  
متخلفين عقلياً!"

رد الشيخ بسرعة: "مش أحسن ما تقعى فى حفرة"

ضحك الفامباير بقوة وهو يقول: "الله ما إنت طلعت عسل أهو يا  
شيخنا وابن نكتة"

أجابته الشيخ: "الحمد لله"

"ولا إله إلا الله"

"محمد رسول الله"

صرخت مديحة بهما: "طب إيه؟ أروح وأبقى آجى فى وقت تانى؟"

تمالك الشيخ أعصابه وهو يسألها: "لى سؤال واحد فقط كى أتأكد

أنك لا تغيرين فى خلقه الله، لون شعرك هل هو طبيعى؟"

"لا أنا صابغة"

قال الفامباير وهو يضحك: "وأنا تمانية"

ضحك الشيخ وهو يقول: "برغم كل هذا الضحك ورغم أنى أحببتك

فى الله إلا أنه يجب أن تأتوا معى للأمير ليقرر ماذا سيفعل فيكم"

رفع سيفه مرة أخرى وهما يسيران أمامه إلى أن وضعهم فى صندوق

معدنى كالقفص يقبع فى مؤخرة السيارة وهو يركبها ويسير بها نحو المجهول

وقفت السيارة أمام مبنى ضخيم مغلقة بوابته بسلسلة حديدية يزينها قفل ضخيم وهبط سائقها ليفتح صندوقه ويخرج مديحة والفامباير، حاولت مديحة أن تهرب فضربت الفامباير برأسها قبل أن تحاول الركض لتتعثر في صخرة ملقاة أرضاً، وقفت في سرعة وحاولت استكمال رحلة هربها إلا أنها اصطدمت بحائط مهدم وانقلبت على وجهها، هذه المرة وقفت لتعود أمام الرجل الذي لم يتحرك من مكانه وهو يتابعها ونظرت أرضاً وهي تقول: "أسفة"

سألها الفامباير وهو يمسك رأسه: "عاوز أفهم ضربتيني ليه؟"

"هما في الأفلام بيضربوا اللي خاطفهم قبل ما يهربوا وهو واقف بعيد"

"فلو مضربتيش حد الخطه هتبوظ يعنى؟"

لم ترد مديحة واكتفت بالصمت، فتح الشيخ البوابة ودفع بالفامباير إلى الداخل، حاول أن يقتحم بعينيه أسوار الظلام لكنه لم يفلح، دفع مديحة للداخل وقبل أن تدخل قال لها برفق: "خدى بالك ... فيه رجالة كتير جوا!"

ردت مديحة والغباء يسيطر عليها تماماً: "ما تخافش عليهم ... هو أنا هاكلهم!"

هز رأسه في أسى قبل أن يركلها في منتصف ظهرها وهو يبصق عليها،  
أغلق الباب، بدأت مديحة تمشى وهي ترفع يديها أمامها إلى أن اصطدمت  
بشيء ناعم، تحسسته إلى أن وصلت لوجهه، شعرت بأنيابه فعرفت أنه  
الفامباير، سألته بسرعة: "إنت سى الفامباير؟"

أجابها بنفاذ صبر: "لا أنا الحيطه"

اعتذرت بسرعة: "لا مؤاخذه ... أنا أسفة"

تركته ورحلت تبحث عن ضالتها، هز رأسه في أسى ودمعة حزن على  
حاله تشق وجنته وهو يناديها: "أنا الفامباير يا مديحة الله يهديك"

فجأة وبدون مقدمات اشتعلت النيران في شيء ما فالتفتنا في عنف  
ليجدا الجن يطير عاليًا وهو مشتعل، أثار المكان قليلاً فبدأ يريا باقي الفريق  
من حوله، تلاقت عينا الجن ومديحة فظهر الهلع على وجهه وهو يطفئ  
نيرانه في سرعة، مرت لحظة صمت قبل أن يسمع صوت الساحر يقول  
بخفوت: "شافتنا؟"

ردت مديحة بسرعة: "أه شفتكم"

أنار الجن مرة أخرى وهو يشعر بالذنب لأنه السبب في توريطهم معها  
مرة أخرى، اقترب الساحر منها وهو يتأمل الفامباير الدهشة قبل أن يقول:  
"فين الزومى؟"

بادلته الفامباير الدهشة وهو يقول: "هو مش معاك؟"

أغلق الساحر عينيه وهو يشعر بالمرارة قبل أن يجيبه: "ولما هو معايا بسألك عليه ليه؟"

هز الفامباير رأسه قائلاً: "إنت صح على فكرة والله"

جمعهم الساحر حوله وهو يقول: "تقريبًا كده إحنا الحمد لله فشلنا ودا كرم من ربنا ... فلو جينا نحصر الخسائر قبل ما نشوف هنعمل إيه هنلاقي إن أهم خسارة"

رد المساعد سريعًا: "فراقك يا جارة!"

عضه القط في قدمه بغل فصرخ معتذرًا قبل أن يستكمل الساحر: "الزومى مش معنا وأنا فهمتكم قبل كده إن قوتنا فى وحدتنا وإن طول ما قلبنا على قلب بعض إحنا قوة لا يستهان بها، إحنا وقعنا فى الدواعش ... يعنى يا هنموت يا هنشوف طريقة نهرب بيها من الموت ... مالهش طريق تانى ... لازم نلاقي طريقة نخرج بيها من هنا وبعدها لازم نكسب ثقتهم ونلاقي الزومى"

صاحت مديحة بسرعة: "أنا عندى فكرة عبقرية"

رد الساحر: "أنا عارف إنى هندم والله بس قولى فكرتك"

"إحنا لازم نلاقي طريقة نخرج بيها من هنا وبعدها لازم نكسب ثقتهم ونلاقي الزومى"

نظر أرضًا في صمت قبل أن يقرر تجاهلها تمامًا وكأنها لم تكن وهو يضع يده فوضع كل الفريق أيديهم فوق يده وقبل أن يتحركوا فُتح الباب في قوة والحارس يصرخ بهم: "جه الوقت الى فيكم تقابلوا الأمير فيه"

رد عليه المذؤوب في سرعة: "لا مجاش ... لو جه نقوله مين؟"

تحدث الحارس بهدوء وهو يقول: "شوف لو الأمر إلى ... أضربكم بالرصاص حالاً أو أذبكم كيف النعاج ... لكن الأمر للأمير"

نظر الساحر لفريقه وهو يقول: "طيب خرينا ورا الكداب لحد فين؟"

رد جاكى شان بسرعة: "طنططا؟"

"نعم؟"

"أصل مش معقول هنروح وراه بنها يعني ... بعيد جداً"

"أنتم بتعاقبونى ليه طيب؟"

أجاب الفامباير: "ما نقصدش يا ريس والله بس يعني ..."

قاطعهم الحارس متذمراً: "فيا أمشى وأجى بعدين يا شباب ... تحركوا

يا أعداء الله"

صاحت به مديحة: "إنت مين إنت عشان تحكم مين عدو الله ومين

لأ"

رفع فوهة مسدسه لتواجه رأسها، صمتت قليلاً قبل أن تقول: "مش

تقول يا راجل ... الى ما يعرفك يجهلك"

صمت الحارس مفكراً للحظات قبل أن يقول: "ما طبعاً طالما ما يعرفنى يبقى يجهلنى، تحركوا"

خرجوا خارج البناية ليجدوا شخص ما ينتظرهم بغطاء للرأس لكل منهم، ألبسه له فى رأسه، إسودَّ العالم أمامهم بينما خنقتهم روائح العرق المختلطة بالذعر وصعوبة التنفس، تحركوا فى صمت إلى أن وصلوا لمكانٍ ما سمعوا فيه لغواً ولغطاً، أزالوا الكمامات عن رؤوسهم ليجدوا أنفسهم أمام آخر شخص يتوقعوه، أمير دولة الخلافة الإسلامية

وقف الساحر ماهر ينظر للجن بغضب بعد أن اختفى الفريق تمامًا وانقطعت أخبارهم تمامًا وبالتالي أصبح الساحر ماهر كالعاجز لا يعرف عنهم أى شيء على الإطلاق، نظر له بغضب وهو يقول: "ها ... إزى الحال دلوقت؟"

رد الجن بسرعة: "والله الحمد لله بخير، أول إمبراح كنت تعبان شوية لما هبطت من أراضى الجحيم ..."

قاطعه مساعد الساحر: "إنت هبطت عشانك جيت مشى ... لو كنت شفتلك مواصلة مكنتش هبطت"

صاح بهم الساحر بغضب: "ممكّن تسكتوا شوية وتدوني مساحة أفكر بيها تفكير منطقي عقلانى ونحلل بيه الأزمة عن طريق تجزئها لعدة مستويات ومناقشة كل مستوى بالطاقة الفكرية اللازمة له"

رد مساعده بذكاء: "طالما هتحلل روح المختبر ... مضمونين أوى"

تجاهله وهو يلاحظ نظرة عدم فهم تنمو في نظراتهما فقال مفسرًا: "عاوزين نفكر في حل للأزمة دى"

ابتسم الجن وهو يقول: "ولا مشكلة ولا حاجة ... كل حاجة ليها حل"

لمعت عينا الجنى وهو يقول هذه الجملة فأثار حماس الساحر الذى صاح به بحماس: "خليت الأدرينالين يعلى فى جسمى بالابتسامه دى، نظرة عينيك بتقول إنك فاهم، خليتى فى أعلى درجات تركيزى"

نظر الجن للمساعد وهو يقول: "إيه البتاع اللى قال عليه دا؟" رد المساعد بسرعة: "هو أنا معرفش إلا قدرى البقال بس، يمكن يقصده؟"

صاح بهما الساحر: "الغباء وحش ... ليه؟ ... لأن له فيه 3 عيوب ... أولاً الغبى ما بيتعشب اللى حواليه هما اللى بيتعبوا ... ثانياً مالوش علاج ... ثالثاً وده الأهم مُعدى ... فبطلوا غباء"

نظر للجنى موجهاً حديثه له: "وانت قولى دماغك فيها إيه؟" صاح الجن بفرحة: "فيها قرون ... هاهاها ... دماغى فيها قرون" نظر له الساحر بغضب وهو يقول: "يعنى لو سميت عليك حرقتك هتبقى مبسوط؟"

صاح الجن مرة أخرى: "هتبسط أكثر لو سميت ابنك على إسمى ... هاهاها"

فجأة قهقهه المساعد فى فرح وهو يقول: "هاهاها قرون ... صح ... عشان إنت جن وكده ... يا ابن الإيه؟"

نظرا له في تعجب قبل أن يكتشفا أنه فقط حضر متأخراً قبل أن يتمالك أعصابه وهو ينظر للمساعد الذى قطع ضحكاته وهو يقول: "أنا عندى رأى"

صاح الجن ههستيريا فرح: "وأنا عندى دليل ... هاهاها ... لا مؤاخذة يا ريس ... القافية حكمت"

نظر له الساحر بغضب وهو يقول: "عارف لو ما سكتتش واحترمت الموقف شوية ... أقسم بالله هحرقك"

بمجرد سماع اسم الله احترق الجن تماماً قبل أن ينظر الساحر لمساعدته في لوم وهو يقول: "مش قلتك الغباء مُعدى؟"

\*\*\*

حضر الجن مرة أخرى وهو يقف بصمت كي لا يُعاقب مرة أخرى، نظر الساحر له بقسوة وهو ينظر للمساعد وهو يقول: "من هنا ورايح ما عادش فيه مجال للسخرية ... لازم نتعلم الجدية في شغلنا لو عاوزين ننجح"

لم يتمالك المساعد نفسه فصاح بمرح: "أنا أعرف دكتور أمراض جدية حلو ممكن يساعدنا"

ضحك الجن قبل أن ينظر له الساحر فصمت وهو يتظاهر بالسعال قبل أن يُصمت المساعد بنظرة قاسية تحمل في مضمونها سبة مُهينة، نظر الساحر لمساعدته وهو يقول: "قبل ما تمشى كان يبدو عليك الذكاء وملامح الحكمة وقتلتى إن كل مشكلة ولها حل"

ابتسم الجن وهو يقول: "بالضبط، أنا فكرت في فكرة مهمة ونفذتها فعلاً... أنا جندت أحد أعضاء الفريق"

ظهر التعجب على وجه المساعد وهو يقول: "جننته؟؟ ... جننت أحد أعضاء الفريق إزاي؟ ... ضغطت على أعصابه لحد ما عقله خف يعني؟؟" صاح به الساحر: "دا أنا اللي هضغط على زمارة رقبتك لحد ما تموت في إيدي"

أجابه المساعد معتذراً: "أسفين يا ريس"

نظر له الساحر وهو يقول: "يا حبيبي إسكت بقى الله لا يسينك وما تتكلمش في السياسة، هتحبسنا منك لله"

نظر للجنى مرة أخرى وهو يقول: "بس الفكرة دي صعبة أوى"

أجابه الجنى: "الفكرة أول ما جتلى حسيها ثقيلة أوى"

رد المساعد مقاطعاً: "وعملت إيه؟ ... جبت إثنين صحابك يشيلوها معاك"

نظر له الاثنان بصمت ولم يردا عليه فقرر الصمت وترك المساحة للجن ليستكمل حديثه مرة أخرى، تابع الجنى: "بس بعد فحص ومراقبة للفريق لقيت نقطة ضعف جاتلى من السما ... ساعتها كان قدامى فرصة واحدة بس إنى أستغلها أو إنها تضيع منى"

هبط الساحر على قدمه يقبلها وهو يقول: "أبوس رجلك قولى إنك استغليتها"

سحب الجن قدمه وهو يقول: "إنت بتعمل إيه بس، أستغفر الله..."  
حُرق الجن تمامًا فنظر المساعد للساحر وهو يقول: "دا طلع الغباء  
مُعدي فعلاً"

\*\*\*

وقف الجنى أمامهم للمرة الثالثة وهو يقول: "في البداية عاوز أعتذر  
عن الغباء اللي حصل مني وبإذن الله...."

هذه المرة لم يستغرق الكثير من الوقت ليعود مرة أخرى ويقف  
أمامهم ناظرًا للأرض في خجل والساحر يسأله: "خلصت خلاص؟؟"

هز الجن رأسه وهو يستكمل كلامه: "استغليت الفرصة صح وقدرت  
أجند أحد أعضاء الفريق ودلوقت بقيت على اتصال مباشر بيه، يعني مش  
هنتحاج نتحرك من مكاننا وهنعرف كل حاجة بتحصلهم"

سأله الساحر بسرعة: "إيه آخر الأخبار؟"

رد الجنى بحماس: "هما دلوقتى في معاقل الدولة الإسلامية، في قلب  
داعش ومش هتصدق بعد ما وصلوا فوجئوا بمين أمير المؤمنين هناك؟"

سأله الساحر: "مين؟"

ولكنه لم يصدق أبدًا الإجابة التي سمعها، هذا آخر شخص على  
الإطلاق قد يتوقع أن يجده في هذا المنصب

أفاق الزومى من غيبوبته ليجد نفسه ملقى وحيداً شريدًا ذليلاً في الصحراء، البرد يتهش جسده والظلام يكاد يغتصب سلامه النفسى اغتصاباً، وقف مترنحاً يتأمل المكان من حوله لكن عيناه لم تستطع سبر أغوار الظلام، أرهف السمع فلم يسمع شيئاً سوى ريح تزار فى وحشية ورمال تهش عيناه وهى تجرى فزعة من الرياح، تحرك بلا هدى وهو يحاول أن يحافظ على سيره فى خط مستقيم، فكر فى نفسه أن الحركة أفضل من انتظار القدر فى استسلام، طال الطريق وبدأ يشعر بالتعب، بدأت خيوط النور تززع ثقة الظلام لينقشع فى ذلة من أمامها، بدأت ملامح الصحراء تظهر جلية أمام عينيه بلا علامات مميزة، مجرد محيط من الرمال الصفراء والصخور المتناثرة تحاصره، جلس على إحدى الصخور وهو يلتقط أنفاسه فى سرعة، ظهرت عاصفة ترابية من بعيد، نظر لها فى تعجب وهو يسأل نفسه: "ولاد أبو إسماعيل؟؟ ... هنا؟"

اقتربت العاصفة فتبين من بين الرمال سيارة دفع رباعى هبط منها ثلاثة ملثمين لا يظهر سوى أعينهم التى يظهر فيها شرر مختلط بغباء يَبِّن لا يخفى على أحد، وقفوا أمامه يتأملون ملامحه الغربية وينظرون للأجزاء المتساقطة من جلده قبل أن يسأله زعيمهم: "من أنت وشنو بتدير هنا؟"

فكر الزومى للحظات قبل أن يثبت قدماه فى الأرض وهو يرفع ذراعيه عاليًا ويقول بصوتٍ خافت: "أنا شجرة"

نظر له المثلثم بغضب قبل أن ينظر لزملائه وهو يقول: "ها المخلوق  
مفكرنا حمقى ... يقولك أنا شجرة وهو واضح جدًا إنه مو شجرة"

ضحك باقى المثلثمين قبل أن يشعر الزومى بالحرج وقبل أن يتحرك  
أوهيبط بذراعيه بجوار جسده قال المثلثم بصوت واضح: "إنت نخلة"  
قال الزومى بتعجب: "يا راجل!"

أجابته الرجل: "تبي تخدعنى وتقولى إنك شجرة بس أنا ذكى ... تدرى  
أنا أذكى واحد هنا ... واضح أوى إنك نخلة"

ابتسم الزومى وهو يقول: "لا وإنت صايح ومش أى حد يخدعك"  
ضحك المثلثم فى ثقة قبل أن يقول الزومى: "بس الحقيقة أنا مش  
شجرة ولا نخلة ... أنا زومى"

سأل الرجل بذلك: "بتطرح إيه دى؟"  
"أفندم؟"

"يعنى الشجرة تطرح ثمر والنخلة تطرح بلح ... الزومى تطرح إيه؟"  
"لا دى ما بتطرحش ... دى بتجمع ... أنا بنى آدم زيك بالضبط"  
"شكلك طيب، نبي نجعمز نشرب طاسة شاهی مع بعضنا بش  
نحكيلكوشنو ندرت"

"وعهد الله ما فهمت كلمة بس احتياطى أهو إنت واللى يتشدلك"  
"نقعد سوا نشرب شای عشان نحكى عملت إيه وإيه جابك هون"

"طب ما تكلمنى عربى الله يباركك عشان أفهمك"

"هذا عربى"

"والمصحف؟"

"شنو بتدير هنا؟"

فكر الزومى للحظات قبل أن يقرر أنه سيجازف ويستخدم ذكائه من أجل النجاة من هذا الموقف: "أنا هنا من أجل الانضمام للجماعة والله ولى التوفيق"

خلع الرجل لثامه وهو يبتسم ويتقدم للأمام مادًا يده أمامه وهو يقول: "أخوك ... مروان كريم"

مد الزومى يده ليصافحه وهو يقول: "الله أكرم يا حبيبي ... بعودة علينا الأيام والله"

سحب المثلث يده وهو يقول بغضب: "شنو الله أكرم ... أقولك مروان كريم ... مروان كريم"

"وانت بألف صحة وسلامة يا كبير ... الوقت بيجرى والله"

"يا حبيبي أنا اسمى مروان كريم ... اسمى مروان وأبى كريم"

"فهمتك يا شيخ مروان ... معلش بقى الشمس كلت دماغى"

"ولا يهملك، تعال معايا المعسكر نشربوا شاهى ونحكى"

صعد الزومى إلى السيارة وهو يبتسم لنجاح الجزء الأول من خطته ولكنه أخفى ضحكاته بصعوبة وهو يفكر في الجزء الثانى من خطته وهو الأصعب والأخطر ... نظر للرمال التى تبتعد فى سرعة وتمنى أن تنجح خطته بنفس السرعة.

\*\*\*

وصلت السيارة إلى المعسكر، يقبع المعسكر فى وسط قرية صغيرة معروفة تاريخياً ولكن لا مجال ولا داعى لذكرها ها هنا، تأمل الزومى القصر الضخم الذى يتوسط المكان وهو يبتسم لأنه فهم لماذا تم اختيار هذه البقعة تحديداً لإنشاء المعسكر، يتوسط القصر قلب المعسكر وتنتشر حوله المباني والباحات التى ينتشر بها ملتحون بلا عدد، فكر الزومى للحظة لو أن خطته انكشفت فماذا سيكون مصيره، تحرك الجميع بعد توقف السيارة تجاه القصر، تصبب الجميع عرقاً وهم يمشون والشمس تجلدهم بسياط من حرارة قبل أن يصلوا لباب القصر، وقف الجميع يلتقطون أنفاسهم فى إرهاق برغم قصر المسافة نسبياً، نظر الملثم للزومى وهو يقول: "الطقس حار جداً"

أجاب الزومى فى سرعة: "متبقاش تحط شطة بس وهو هيبقى كويس"

قبل أن يغتاله الملثم فُتح باب القصر، لوهلة شعر الزومى كما لو أنه مات، مات وبعث فى الجنة، نسمة من الهواء البارد المثلج لفعته فى وجهه مع فتح الباب، دخل إلى القصر قبل أن يُغلق الباب من خلفه فى سرعة كما لو كان الموجودين بالقصر يخشون أن تخرج نسمة من الجنة

لتبرد قلوب الكادحين بالخارج الملوحة وجوههم من الشمس، نظر الزومى حوله في تعجب، النقيض تمامًا، النباتات في كل مكان تضى بهجة على المكان، عدة تكييفات تعمل بقصارى جهدها لتجعل المكان مثل الثلاجة، الفواكه باختلاف أنواعها تتربع على عروش الأطباق بينما اللحم المشوى تطفور رائحته عاليًا لتثير جوع المشتاقين للقمة صغيرة بينما بالخارج يكبح الملتحون من أجل شربة ماء ولقمة خبز يابس وكأن هذا القصر مثال مصغر للشعوب العربية التي يرتع حاكموها في العز ويلتهمون من الخير أطنانًا بينما يتقوت شعوبهم بالفتات الذى يفضونه عن ثيابهم وتلفظه أفواههم كأنهم يجودون به عليهم، مشى المثلث إلى أن وصل لمكان ما به عدة وسائد فجلس علس إحداها وهو يشير للزومى ويقول: "جعمز"

جلس الزومى وهو يراقبه بأعين لا تفهم قبل أن يقول: "هنا الحُكام، المختارين والمصطفين ... فاهمنى؟"

هز الزومى رأسه متفهمًا وهو يقول: "أيوه طبعًا، هو أنا غبى، كل الى اسمهم مصطفى أو مختار بتلموهم هنا"

ضحك المثلث وهو يقول: "ما بقصدش كده ... دا مقر الحكام ... القادة ... الملوك ... هنا كل الكبار"

هز الزومى رأسه بفهم وهو يتأمل المكان من حوله قبل أن يتابع الليبى كلامه وهو يقول: "طبعًا ... وهما يعنى هيتعبوا ويعرقوا زى اللي برا ... ناس مرتاحة وناس شقيانة"

"وهل تتساوى الرؤوس يا أخ زومى ... عشان تنضم لينا هنا لازم تبدأ من برا ... وتندرج وتثبت ولناك لنا ولنا فقط ... تنسى كل التعاليم وكل القواعد اللى تعلمتها ... هنا الولاء للجماعة وبس"

"أكيد ده مش هيتعارض مع الولاء للدين والولاء للبلد"

"هنا الولاء للجماعة، الرفعة للجماعة، لما الجماعة تعالى تبقى البلد هتعالى"

"طب والدين؟"

"الدين لله يا أخ زومى ... الدين لله فقط"

كتم الزومى أنفاسه كى لا يتلفظ بأى شيء يكشف خطته، ووضعت أمامه أكواب الشاى فتناول كوب وهو يرتشف رشفة ويقول: "بس أنا مش عاوز أبداً من برا ... أنا عاوز أبداً كبير عشان أفضل كبير"

"تعجبى يا أخ زومى ... يبقى لازم تضحى عشان تبدأ كبير ... ولازم تثبت ولناك بالطريقة الصعبة"

سمع الجميع صوت جلبة وصوت شهقات ورأوا الجميع يقفون فى احترام منكسى الرؤوس فى رهبة، انتفض الليبى وهو يقف منتبهاً بينما الزومى منهمك فى شرب الشاى، لكزه الليبى قدمه كى يقف وهو يقول بصوت خافت: "قف ... حضر الأمير"

سمع الزومى الكلمة فوقف منتبهاً وهو ينكس رأسه باحترام ويراقب أمير المؤمنين الذى يهبط السلم يرقل فى عباءة حريرية وفى يده ساعة

سويسرية من أفخم الأنواع، ويجواره شخص أجنبي أشقر الشعر يرتدى نظارة شمسية يحمل بيده حقيبة ناولها للأمير المؤمنين وهو يقول له بعربية مهشمة: "لا تنسى، ندع لك ما تطلب ونمدك بما ترغب من أجل أن تحقق أهدافنا"

خرج الأجنبي من باب القصر وهو يغلق الباب خلفه بينما اقترب أمير المؤمنين من الزومبي وهو يسأله: "إنت مين؟"

وجد الزومبي نفسه وجهًا لوجه أمام أمير المؤمنين شخصيًا، أهم شخص في المكان وهنا تبدلت كل الخطط وتبدلت كل الأمور للأبد

وقف أمير المؤمنين أمام الزومى وهو ينظر في عينيه بتحدٍ منتظرًا أن تنكسر عينا الزومى أمامه إلا أن الذى حدث هو أنه سمع صوت زئير خافت قبل أن تحمر عينا الزومى وهو يخطو خطوة للأمام، تراجع الأمير بدهيئاً قبل أن يستوعب أن الجميع ينظر له بدهشة!

أهذا حاصد الاحترام وصائد الرهبة والخوف؟

أهذا أمير المؤمنين الذى تنحنى أمامه الجبال والقوانين فى خضوع وخنوع؟

ابتسم الزومى وهو يشعر أنه اقترب خطوة من هدفه، مد يده للأمير وهو يبتسم بسخرية ويقول له : "الزومى"

شعر الأمير بالضيق وهو يصيح به: "تأدب فأنت فى حضرة أمير المؤمنين"

ابتسم الزومى وهو يضيف: "السابق، أمير المؤمنين السابق"

صاح به الأمير: "تأدب"

ضحك الزومى وهو يقول: "وهو أنا مش مؤدب؟"

على زئيره ليملاً فضاء القصر وهو يقترب من الأمير، شعر الأمير بالخوف لكنه لم يتراجع، لم يهتز وتظاهر بالثقة وبالفعل انطفأت نيران

الخوف في قلبه وحل محلها طوفان من الثقة والغرور، سأله الأمير مرة أخرى بصوت هادئ: "هل تعرف أن إشارة صغيرة منى تساوى حياتك؟"

هز الزومبي رأسه: "عارف ده كويس جدًا، بس السؤال الحقيقي هل هتقدر تديهم الإشارة دى؟، هتسمح لتابعيك يعرفوا إنك ما قدرتش تقف أمام زومبي وتكمل كلام معاه للأخر وإنك مجرد ما حسيت إنك واقف في حته ضيقة على غرورك قررت تقتل وتديج وتسفك الدم وعشان إيه؟، مفيش هنا أى تهديد عليك، ولا إنت خايف؟"

"أنا لا أخاف"

"مفيش حد مش بيخاف وعمومًا إحنا فيها، إيه رأيك نلعب لعبة صغيرة تثبتلى فيها وتثبت للناس دى إنك مش خايف"

"قلت لك أن أمير المؤمنين لا يخاف"

"هو حضرتك متخلف؟ ... مش قصدى إهانة والله بس ليه بتستخدم الضمير الثالث في كلامك؟"

"أمير المؤمنين لا يستخدم الضمير الثالث أبدًا"

"دا إنت غبى بقى، عمومًا قلت إيه؟"

نظر الأمير لتابعيه فلاحظ نظرة عدم الثقة والهمهمات الفارغة التي تسرى بينهم وبين بعضهم، آخر شيء يريده هو أن تترزع الثقة والهيبة التي بناها طيلة هذه السنوات بالدم والخوف، إمبراطوريته التي بناها وأحكم وثاقها تنفك أو أصرها وتنحسر من بين أصابعه كالرمال، شعر بالغضب

يتملكه وقبل أن يصدر حكمه بإعدامه شنقًا أو حرقًا أو ضربًا بالرصاص أو رميًا من سطحٍ عالٍ أو رميًا من هاوية أو إلقاء في جرف أو دفنه حيًّا أو إذابته في محلول حمضى فكر في كلماته، كان بين خيارين أحلاهما مر إما أن يذعن له في تحدٍ لا يعرف عواقبه أو أن يرفض ليظهر خوفه وعدم ثقته بنفسه أمام الجميع، فكر للحظة قبل أن يحسم أمره وهو يمد يده أمامه قائلاً: "أبو بكر البغدادي"

أجابه الزومى بابتسامة: "2 كيلو لبن و5 زبادى"

ضحك الجميع قبل أن تخرسهم نظرة حادة من أمير المؤمنين وهو يفكر في الأزمة وكيفية حلها، لا شيء يستعصى على أمير المؤمنين

\*\*\*

وقف الزومى أمام الجميع متأملاً فصيل صغير منهم، ملتحنون يبدو على وجوههم الغباء وتطفو في أعينهم البلامة، وجوه تغزوها لحي غير منسقة وشعور طويلة متطايرة، أزياء أقرب للعسكرية وتسليح شبه كامل، رايات سوداء تطفو عاليًا يطيرها الهواء، نظر لهم وهو يشعر بالخوف يتسلل إلى قلبه بعض الشيء، بإشارة واحدة من الأمير سيصبح الزومى كدجاجة بين أيدي الشيف الشربيني بشاربه العملاق، ابتلع ريقه وهو يسمع خطابًا حماسيًا يلهب النفوس لكن الأغبياء لم يهتزوا، انتهى الأمر بإعلان التحدى، طلب مقابل طلب، لا مجال للتراجع ولا مجال للعودة، سيطلب كلاً منهما طلب من الآخر وعلى الآخر أن يذعن وينفذه دون جدال أو نقاش وإلا أمسى خاسراً بدأ الأمر بطلب الأمير من الزومى، ابتسم وهو يقول: "هناك معسكر قريب من هنا .. مكان خاص بالمقاومة الشعبية،

مسلح على أعلى مستوى ومجهز للغاية، يملكون نوع معين من الذخيرة نريده ولكن إذا اقترينا منهم فستحدث حرب يموت بها العديد من رجالى، المطلوب منك ببساطة أن تدخل المعسكر لتأتينا بالذخيرة قبل الغروب، ما رأيك؟"

سأله الزومبى: "معسكر إيه؟"

"معسكر للمقاومة الشعبية"

"ماله بقى؟"

"نريدك أن تقتحمه لتأتينا بالذخيرة"

"أقتحم إيه؟"

"المعسكر"

"أنهى معسكر"

"معسكر المقاومة الشعبية"

"فهمت ... إنت عاوزنى أقتحم المعسكر بتاع المقاومة عشان أجيب

الذخيرة ... صح؟"

"بالظبط ... وقبل الغروب ... أمامك حوالى 5 ساعات"

"أعمل فمهم إيه؟"

"قهوة لاتيه"

"يعنى إنت راضى عن نفسك وإنت أمير مؤمنين وبتهزر كده ... فين هيبتك؟"

"فى الخيمة بالداخل هبة وكريمة وأمانى وكافة الجوارى"

"إنت مفيش منك أمل!"

"لا أمل بالداخل أيضاً"

"الرحمة"

"هى أيضاً بالداخل، هل تعرف كل الجوارى؟"

"مش هرد عليك ... عارف ليه؟ لأنك غبى وأنا مش بقولك كده عشان إنت واقف أو عشان ده فى وشك يعنى ... لا والله قدامك أو من وراك هقولها يعنى ... إنت غبى ... وإوعى تفكرنى بجمالك ... والله أبداً، أصل أنا غبى قديم يعنى"

احمر وجه أمير المؤمنين قبل أن يقرر أن يكظم غيظه وهو يقول:  
"والكاظمين الغيظ"

سأله الزومى: "مالهم بقى؟"

أشار له الأمير ليرحل وهو يكتم غضبه وبالفعل رحل الزومى وهو يفكر ماذا سيفعل فى هذه الورطة، الوقت لا يسعفه والمهمة صعبة لدرجة الاستحالة

\*\*\*

تسلل الزومبي مهدوءً مختفيًا تحت عباءة الصمت ملتحفًا بخطوات بطيئة ولاعنًا درجة الحرارة والرمال الساخنة، ألقوه وحيدًا دون عون أو سلاح ولكنه أخبروه بأماكن نقاط الحراسة، حاول أن يسلك طريقًا يبعده عن نقاط الحراسة وبالفعل كان الطريق أمامه واسعًا بلا عوائق، مشى بضع خطوات محاولًا ألا يصدر أي صوت قبل أن يشعر بحركة من خلفه وقبل أن يلتفت شعر بفوهة سلاح آلى تقبل رأسه من الخلف، برودة المعدن جعلت رجفة باردة تسرى في جسده، دون حديث أدار وجهه ببطء ليواجه ملثم قاسي الملامح وإن كانت هناك لمعة ما في عينيه تريح النفس، أشار له الملثم أن يهبط على ركبته وقبل أن ينفذ أمره ركله الملثم في ركبته فسجد أمامه مرغمًا، شعر بالغضب حيث أنه لم يقاوم ولم ينوى المقاومة. احمرت عيناه واحمر وجهه والغضب يغتصب سلامه النفسى، حاول الوقوف إلا أن الملثم ضربه بظهر السلاح على جبهته فسقط أرضًا والصداع يشق رأسه، هنا لم يعد يحتمل، زار بقوة وهو يقفز ليعتدل واقفًا مواجهًا للملثم، انتفخت أوداجه وشعر بالغضب يخرج من جسده، تراجع الملثم أمامه فشعر بالثقة تغزو جسده، قشعريرة ثقة ورجفة غرور تضافرا ليعيدا له قوته الوحشية، قفز يعترض طريق الملثم وهو يزأر بقوة؟، رائحة أنفاسه الكريهة واحمرار عينيه ولعابه السائل جعلوا الملثم يتراجع أمامه في خوف، أعطاه ظهره وهو يركض فابتسم بثقة، لنبدأ اللعبة !

وقف ينشج بقوة وجسده يرتجف من نشوة اللحم البشرى والدماء الطازجة، فمه ملوث بالدماء وتحت قدميه ترقد جثة الملثم تعوم في بركة من الدماء، زار بقوة وهو يركض بوحشية تجاه المعسكر، لتحاولوا ردعه!

فاضت أنهار الدماء وتكاثرت بها الجثث، زهقت الأرواح وتناثرت  
الأشلاء، علا الصراخ وسكتت الأنفوس، أما منكم من يستطيع رده؟

وقف ينشج أمام المعسكر وهو مغطى بالدماء من رأسه حتى قدميه،  
يرتجف لنشوة نساها تمامًا، شعور بالذنب يحاول أن يطفو للسطح إلا  
أنه في بحر النشوة رضيعًا لا يعرف السياحة، تجذبه أمواج الوحشية  
بعيدًا فيبكي وحيدًا في ركن مظلم، اقتربت منه سيارات أمير المؤمنين،  
ابتسم لتتكشف أسنانه وأنيابه المصبوغة بالدماء، وقف أمير المؤمنين  
ينظر له بدهشة وهو لا يصدق ما يرى قبل أن يسأله: "أين الذخيرة؟"

ابتسم الزومبي وهو يقول بصوت مخيف: "المعسكر كله تحت أمرك"

أشار أمير المؤمنين بيده لثلاثة ملتحين فانصرفوا لداخل المعسكر  
يتأملونه قبل أن يعودوا له مطأطيء الرؤوس وأحدهم يقول: "لا بد أن ترى  
بنفسك"

هبط أمير المؤمنين من سيارته وهو يدلف إلى المعسكر يتأمله، ساحة  
خرية وأنهار دماء وأكوام جثث ورائحة الموت تغلف على المكان بأكمله  
وجميع مخازن الذخيرة مفتوحة على مصراعها منتظرة أن يخرج أحدهم  
الذخائر من رحمها، شعر بالخوف فعاد مرة أخرى للزومبي وهو ينظر له  
قائلًا: "بمفردك؟"

ابتسم الزومبي وهو يقول: "مش هتفرق، فيه اتفاق كان ما بيننا  
ودلوقت أنا عملت اللي عليا، جاهز تعمل اللي عليك؟"

بلغ الأمير ريقه بصعوبة وهو يشير لرجاله أن يستولوا على الذخيرة  
وهو يبتلع ريقه بصعوبة ومهز رأسه إيجابًا

\*\*\*

خرج الزومى من تحت المياه الباردة والتي ساهمت برودتها في إطفاء نار الغضب وبركان الوحشية المعتمر بداخله وهو يجفف جسده ويرتدى ملابس نظيفة أتى بها له رجال الأمير قبل أن يدخل لغرفة الأمير مرتجفاً بسبب برودة الطقس بداخلها بسبب جهاز التكييف، ابتسم وهو يتناول تفاحة ويتأملها برفق قبل أن ينظر له الأمير ويبتسم في ارتباك لاحظته الزومى وهو يسأله: "بقالك أد إيه أمير المؤمنين؟"

" منذ تأسيس دولة الخلافة الإسلامية"

" طب كفاية عليك كده، الجزء بتاعى من الاتفاق إننا نعمل اقتراع بينى وبينك على الإمارة"

"إمارة أبو ظى؟؟ ... أنا موافق"

"إحنا هنلعب بنك الحظ؟ ... على إمارة دولة الخلافة طبعًا...قلت إيه؟"

"موافق أن يتم الاقتراع بشرط أن يشرف عليه الحلاق الرسمى للدولة"

"حلاق إيه بس ... إيه علاقة الحلاق بالاقتراع؟"

"مش هنحلق أقرع ... إذن وجود الحلاق ضرورى"

"لا اقتراع يعنى انتخابات ... بينى ... وبينك"

ابتلع الأمير ريقه بصعوبة وهو يهز رأسه موافقًا كيلا يفترسه الزومى ومشهد الجثث المقطعة إلى أشلاء لا يفارق خياله

وقف الجميع يتأملون ملامحه بعض الشيء قبل أن يبتسمون في ارتياح، الخوف والقلق الذى تولد في صدورهم حينما علموا أنهم سيقابلون أمير المؤمنين تبخر الآن، ها هم يقفون أمام أمير المؤمنين بشحمه ولحمه دون أن يشعروا بذرة خوف أو فزع تجتاح قلوبهم، بدأ بعضهم في الابتسام بحذر، ربما تكون خدعة منهم كي يكشفوا شيئاً ما، لم يتمالك الفامباير نفسه وهو يركض نحو الزومى ويحتضنه في لهفة وهو يقول: "كنا قلقانين عليك أوى"

ابتسم الزومى وهو يقول: "عمر الشقى بَقى"

احتضنه الجميع وهم يربتون على كتفه ويثنون على حسن مظهره ويسألونه عشرات الأسئلة عن كيفية حصوله على هذا المنصب، احتضنه المذؤوب بقوة وهو يقول: "كنت واحشنى والله"

أجابه الزومى: "إنتم أكثر"

"غيابك فارق برضه ... ومش معايا أنا بس معانا كلنا"

"الله يباركك"

"منور الدنيا والله"

"الله يخليك"

"ما إتعرفناش بحضرتك مين بقى؟"



اقترب منهم المثلث قبل أن يقول له الزومى: "ناب طويل مش ديل طويل ... سيب ديل القط !! ... طب بتحطه فى بقك ليه طيب؟ ... رجع على مديحة بقى ... أيوا أبو ناب طويل ده ... ده الأستاذ فامبير صديقى"

تجاهل الساحر المثلث الذى ينظر للفامبير فى تعجب وجلس أرضاً وهو يسأل الزومى: "بس إنت بقيت أمير المؤمنين إزاي؟"

ابتسم الزومى وهو يقول: "أنا كنت عاملها تحدى بينى وبين الأمير السابق وقتلته نعملها اقتراع لقيته عاوزنا نحلق أقرع واللى يخلص الأول هو اللى يكسب، قلت انتخابات لقيتهم عاوزينا نستخى واللى يلاقى التانى الأول هو اللى ينجح"

"إيه الغباء ده؟؟ الناس دى ما بتفهمش!"

"بالظبط، أنا لا ينفع أحلق أقرع لأن فروة راسى واقعة ولا ينفع أستخى هنا عشان أنا معرفش المكان كويس زيم"

"هو دا اللى فارق معاك؟"

"أه ... ليه؟"

"لا مفيش ... كمل يا عاقل يا نبيه ... كمل"

"جاتلى ساعتها فكرة عبقرية قدرت بيها أبقى أمير المؤمنين"

"عملت إيه؟"

"عملت استفاء ... هل توافق أن أكون أمير المؤمنين؟"

"مخفتش تفشل؟"

"يا باشا إنت في دولة عربية ... مفيش استفتاء نتيجته بتطلع لأ ...  
أبدًا"

"عفارم عليك"

شعر الزومى بالفزع وهو ينفض ملابسه ويقول: "فين؟"

"لا قصدى برافو عليك"

"الله يخليك يا عمهم"

"بص هو إنت أمير مؤمنين فما ينفعش أهينك قدام الناس بتوعك  
... فإحنا هنعمل إيه بقى؟ ... أنا حضريك على قفاك افتراضياً"

أمسك الزومى قفاه وهو يقول: "بس إيدك تقلت يا ريس"

في هذه الأثناء كان المثلثم يقترب من الفامباير وهو يقول: "ماذا تعنى  
فامباير؟"

ابتسم الفامباير وهو يقول: "يعنى مصاص دماء"

انصرف الرجل عنه وهو يقول: "أليس من العيب أن تكون رجلاً  
كبيراً وتكون مصاص!!"

وقف أمام الجن وهو يقول: "أأنت إبليس؟"

أشار له الجن أنه أخرس لا يتحدث، سأله مرة أخرى: "إبليس؟"

"أباأبوو أبا"

"إذا فأنت إبليس؟"

صرخ الجن في وجهه: "أخرس يا عم ... أنا أخرس"

انصرف الرجل عنه وهو يقول: "لا حول ولا قوة إلا بالله"

وقف أمام القط وهو يداعبه بين أذنيه، قر القط في سعادة وهو يموء بفرح، داعبه الرجل مرة أخرى فمأء في سعادة، تحسس الرجل جسده مرة أخرى فمأء بقلق قبل أن يتحسس الرجل ببطء. صاح القط بفرع وهو يبتعد: "ما تخلينيش أقلق منك بقى"

تركه الرجل وهو يتأمل جاكى شان ويقول: "من أنت؟"

بفخر أجابه: "جاكى"

بهيستيريا ضحك الرجل وهو يقول: "جاكى الموت يا تاركة الصلاة"

ضيق جاكى بين عينيه وهو ينظر له بغضب ويقول: "إطلع بره"

تركه وهو ينصرف لمديحة ويتأمل شعرها وعينها قبل أن يشير للجن

ويسألها: "أهذا إبليس؟"

"إدريس؟"

"إبليس؟"

"بليس ... لا بعيدة"

تركها وانصرف دون حوار كثير فصاحت بالجن بفرحة: "كان عاوز يعرف منى إنت إبليس ولا لأ بس أنا عملت فيها مش سامعاه وما رضيتش أقوله إنك جن ... ماشى؟"

سمعها كل الموجودين فى المكان، وضع الجن يده على وجهه فى يأس والملثم يقترب من المذؤوب ويقول: "إنسان برأس كلب؟"

ابتسم المذؤوب وهو يقول: "إنسان براس ذئب ... مذؤوب"

هز الملثم رأسه متفهمًا وهو يقول: "إنسان برأس كلب ... مكلوب"

صاح مساعد الساحر بسرعة: "مكلوب على أمره"

ضحك الجميع قبل أن يأمره الزومبى أن يخرج من الغرفة ليجلس مع أصدقائه، حان الآن وقت التحدث فى خطتهم الجديدة، فالآن اختلفت كل الأمور

جلسوا يتناقشون بعض الوقت قبل أن يقول الساحر: "أنا عندي فكرة كويسة جدًا، تعالى نجرب نتكلم معاهم ونشوف خطتهم هما إيه؟"  
صمت الزومبي للحظات مفكرًا في فكرة الساحر قبل أن يقول: "تمام، أنا شايف إن دي فكرة كويسة جدًا"

نادى بصوتٍ عالٍ على التابع الذى يقف فى الخارج: "ياعبدالله"

لم يأتية رد فنادى بصوتٍ أعلى: "ياعبدالله"

للمرة الثانية لم يأتية الرد فصاح بغضب بصوتٍ جهورى: "إنت ياعبدالله"

فتح الباب بقوة ودخل عبدالله حاملاً سيفًا صارمًا وهو يصيح فى الزومبي بغضب: "إيه ياعم، إيه الدوشة دي كلها، سامعك ومش عاوز أرد عليك"

شعر الزومبي بالغضب وهو يسأله: "ليه مش عاوز ترد، البيه وراه إيه شاغله؟"

"إنت هتصاحبني؟"

"ما تنساش إنك بتكلم أميرالمؤمنين"

"مش ناسيين يا عم بس برضه قدر إننا مصريين زى بعض. وعاوز إيه؟  
... خير؟ ... أوْمرنى؟؟ ... إيه؟؟"

"هو لو مش هيضايق معالك يعنى كنا عاوزين مجموعة من القادة  
عشان نتناقش معاهم"

"مش هيضايقنى لأ"

"طب روح هاتهم ... واقف ليه؟"

مشى عبدالله وهو يخبط كَفًّا بكف فى تعجب ويقول: "كنت واقف  
قالى تعالى، جيت قالى روح، حاجة خ..."

أغلق الباب خلفه بقوة وانصرف، نظر جاكى شان للزومبى وهو يقول:  
"بس إنت مسيطر"

ابتسم الزومبى وهو يقول: "أخذت بالك؟"

أمسكت مديحة بالقط من ذيله وهى تضحك وتدور حول نفسها وهو  
يموء فى خوف قبل أن تتركه فجأة لتقذفه نحو الحائط، اصطدم به بقوة  
ووقع أرضًا وهو يتأوه قبل أن يقول للفامبير: "ماهو أنا مستحمل غباها  
عشان هى مراتك بس، بس وعهد الله لو لعبت بيا تانى هزعلك منى"

قال الفامبير بغضب: "ما تقولش مراتك بس"

صفعته مديحة على مؤخرة رأسه بقوة فتابع حديثه: "قول روح قلبك،  
ملاكك، عمرك ... مش شايف الرقة وهى هتبط من جناها ... ولا دى دهن  
دى ولا إيه؟"

صفعته مرة أخرى فصمت وعيناه تدمعان. نظرلهجاكي شان وهو يقول: "الأستاذ كمان مسيطر، ماشاءالله"

جانبًا انتجى مساعد الساحر والمذؤوب وهما يتناقشان بعمق قبل أن يتوجها للساحر وهما يقولان: "عاوزين مرتباتنا تزيد"

سألهما الساحر بهدوء: "أنا بديكم مرتبات؟"

نظرا لبعضهما البعض قبل أن ينظر له المذؤوب وهويقول: "لا"

عادا مرة أخرى للنقاش جانبًا قبل أن يعودا إليه مرة أخرى والمساعد يقول: "عاوزين مرتبات"

عقب المذؤوب: "وعاوزين نزودها"

صاح بهم الجن برسالة عقلية شرسة فانصرفا بعيدًا وكلاهما يبحث في رأس الآخر عن حشرات قبل أن يقول الجن للساحر: "عالم فاضية، دماغها مش في المصلحة"

"اه والله"

"هات عشرين جنييه بقى من معاك"

"إيه؟"

"عشرة طيب؟"

لم يرد عليه الساحر واكتفى بنظرة غاضبة، تابع الجن: "خمسة؟؟"

لم يرد عليه الساحر فانصرف الجن وهو يقول: "ساحر مهزأ وفريق فاشل وعالم مش نافعة، حتى الفشل فشلوا فيه"

سمع الجميع صوت طرقات الباب قبل أن يفتح ويدخل عبدالله ويقول: "جبتك ثلاثة من القيادات برا ... أدخلهمك ولا إنت مش عاوزهم ولا أعملك إيه طيب ... خنقتنى"

نظر الساحر للزومى وهو يقول: "هو كاسرعينك؟"

تجاهله الزومى وهو يقول له بغضب مصطنع: "دخلهم واطلع أقف برا"

انصرف عبدالله وهو يقول: "ما طبعًا هقف برا ... أمال هقف جوا يعنى"

دخل ثلاثة من الملتحين يقفون أمام الزومى فى احترام بالغ، فهم يقفون فى حضرة أمير المؤمنين الآن، نظر لهم الزومى قبل أن يقول لهم: "أنا جمعتمكم النهاردة عش ..."

قبل أن يستكمل كلامه قاطعته مديحة ضاحكة: "إنت جمعتم وأنا هطرحتم"

نظر لها الزومى وهو يفكر فى الرد عليها: "مديحة ... أصل ... ال ... هومش"

قبل أن ينظر للفامباير وهو يقول: "حسى الله ونعم الوكيل"

نظر لهم مرة أخرى وهو يقول: "أنا أولاً جمعتكم هنا بصفتي أمير المؤمنين ... أنا مش مبسوط من اللقب ده ... أصل مش معقول أنا تقى أوى ومؤمن كفاية عشان أبقى أمير ... ولمين؟ ... كل المؤمنين !! ... لأ أنا بفكر أغيره ... رأيك مايه؟"

هز الجميع رؤسهم موافقين وأحدهم يقول بصوتٍ غليظٍ: "هذا والله عين العقل"

قاطعته مديحة قائلة: "ومناخيره فين؟"

تجاهلها الرجل وهو ينظر أرضاً قبل أن يسألهم الزومبي: "طب يبقى بلاش أمير المؤمنين ... إيه رأيكم في صلاح المؤمنين؟"

نظروا له في دهشة فقال: "عارف إنه قرارصعب ... عموماً فكروا فيه براحتكم وما تنسوش فيه كمان طارق المؤمنين"

قبل أن يتابع كلامه متجاهلاً ذهولهم وهو يقول: "عاوز كل واحد فيكم يكلمنى عن نفسه وعن منصبه عشان نجهز خطة كبيرة سوا نسيطر بيها على الكوكب"

هزوا رؤوسهم وبدأ الواقف على اليمين يتحدث: "أنا المسؤول الجديد عن الدعوة والإرشاد الدينى فى الدولة، عيّنت فى منصبى هذا بعد أن فشل المسؤول السابق فى عمله، كان يريد فرض الدعوة بالسيف والدم والقتال، سامحنى يا سيدى لو نسيت شيئاً ما أو ارتبكت، للأسف أشعر طوال الوقت كأننى نسيت شيئاً مهماً وهذا الشعور يتسبب فى عدم تركيزى"

هز الزومبي رأسه متفهمًا بينما استكمل حديثه: "كما تعلم سيادتكم أن الإسلام دين يسر ودين محبة وليس دين إكراه أو دين قتال ودم وهذا هو الخطأ الذى وقعنا فيه منذ تأسيس دولة الخلافة وللأسف فإن الأمر قد فات أو ان تصحيحه، لذلك وضعت خطة تدريبية للقيام بهذا العم ... "صمت مفكرًا للحظة قبل أن ينتبه أن انتباهه قد شئت بواسطة أفكاره فعاد لتركيزه وهو يعتذر: "أعتذر فإن فكرة أنى نسيت شيئًا هامًا تسيطرعلى"

استكمل حديثه قائلاً: "وهنا يأتي دور الخطة التى تعتمد على الصلاة باستخدام الآيات التى تدعو للحسنى وتكرارها لزرع فكرة الحسنى فى الدعوة والمعاملة لأن كما تعلم بدأ العالم بأكمله يكرهنا بسبب كثرة القتل والدماء والوحشى ..."

صمت مرة أخرى قبل أن يهز رأسه بعنف وهو يقول: "أعتذر ... أمل أن أتذكر قريبًا ما نسيت، هذه هى خطتى وأتمنى أن تساعدنى سيادتكم فى تنفيذها"

ابتسم الزومبي وهو يقول: "خطة عظيمة فعلاً يا ... إنت اسمك إيه؟"

"جرجس فوزى بطرس"

"لسه مش فاكتر إنت نامى إيه يا جرجس؟"

"لأ ... ولكننى سأتذكر قريبًا"

"ربنا يعينك"

نظر الزومبي للشخص الثاني وهو يشير له أن يبدأ بتعريف نفسه:  
"أبو البراء اللبي"

"أهلاً يا أبو براء ... بتعمل إيه هنا؟"

"مش عارف الحقيقة!"

"مش عارف إيه؟"

"مش عارف أنا بعمل إيه هنا الصراحة"

"أيوا يعنى إنت جاى ليه؟"

"ما عنديش أى خلفية عن الموضوع ده"

"تعرف دولة الخلافة الإسلامية؟"

"مين من عند البنزينة كده؟"

"طب دورك إيه هنا؟"

"حضرتك صدقتى أنا ما أعرفش حاجة خالص"

"طب مين جابك؟"

"ولا أعرف ... أنا كنت مصطبح وفقت لقيتني هنا"

"مصطبح اللى هو مصطبح على الصبح"

"لأ مصطبح اللى هو شارب حشيش ... معاك ولاعة؟"

أنهى كلماته وهو يستدير ليرحل وأغلق الباب خلفه وسط ذهول الجميع قبل أن يشير الزومبي للثالث أن يتحدث: "أنا أبو إسماعيل البيروتى"

"دورك إيه هنا؟"

"أنا مسؤول التسليح فى الجماعة هنا"

"حلو أوى ... كلامنا هيطول ... توكل على الله إنت يا جرجس وروح ركز كده هتفتكر إنت ناسى إيه"

فتح جرجس الباب وهو يخرج ودخل عليهم أبوالبراء اللببى وهو يسألهم:

"حد معاه ولاعة؟"

ردت مديحة: "بعتنا واحد يجيب، أقعد استناه"

جلس أبوالبراء بجوارهم قبل أن يتحدث أبوإسماعيل قائلاً: "مؤخرًا انتشرت عننا فكرة أننا همج ومتخلفين وبنحارب بالسيوف وكده فأنا قررت أعمل قنبلة نووية"

"كلام جميل"

"عشان كده بقالنا 3 أيام مبزميش نوى البلح"

"غبى، والله إنت إنسان غبى. يا سيدى الفاضل نووية من النواة اللى هى فيها ذرات دى، النواة والذرة والتفاعلات دى كلها اختزلتها بعبائتك البشرى الفانى فى النوى بتاع البلح، خلاص ما بتشغلوش دماغكم، بتلاقوا

الفكرة حلوة بس بتستخسروا تكملوا جميلكم وتفكروا فيها صح، خلاص الغباء والسطحية سيطروا عليكم تمامًا، تفكر القنابل النووية لو بتعمل بنوى البلح يبقى ليه مش كل الدول عندها تسليح نووى؟؟" تقريبًا كل الدول فيها تسليح نووى باين؟، هي الأستاذة اللي ورا دى مش منفجر في وشها قنبلة نووية أهو مشوهة ملامحها خالص"

"هو وشها كده طبيعى"

"إحلف!!"

"سيبك منها وقولى هينفجر في وشها سلاح نووى منين ومصبر مافهاش نووى"

صاح الفامباير من الخلف: "لأ مصر فيها، خالد النووى"

أخرج أبوإسماعيل سلاحه وهم أن يطلق عليه الرصاص لولا أن قفز مساعد الساحر وهو يرفع فوهة السلاح للأعلى لتنتلق عدة رصاصات نحو السقف، تمالك أعصابه وهو يصمت لوهلة قبل أن يترك السلاح لمساعد الساحر وهو يستعيز بالله من الشيطان الرجيم قبل أن يعتذر: "أنا آسف إنى كنت هضرب عليكم نار وآسف كمان إن فى رصاصه جت فى وش الأنسة شوتهه بالمنظر ده"

أجابته الفامباير من الخلف: "دا وشها الطبيعى حضرتك"

شعر بالذهول وهو يسأل: "بتتكلموا جد؟"

تدخل الزومبي وهو يقول: "سيبك منها، أنا المهم عندي دلوقتي تبطلوا الغباء بتاع نوى البلح ده، كل نوى البلح ترموه أو تزرعوه، مفيش قنابل نووية بتتعمل بنوى البلح، إنت فاهم"

"فاهم سيادتك"

"عاوزين تعملوا قنبلة نووية إسألوني تعملوا إيه وأنا أقولكم"

"طب حضرتك شايف نعمل إيه؟"

"لمى نوى المشمش اللى فى المنطقة كله، عشان هنعمل قنبلة نووية على أحدث طراز"

هز أبو إسماعيل رأسه متفهّمًا قبل أن يخرج من الغرفة، بمجرد أن أغلق الباب نظر الساحر للزومبي وهو يسأله: "شكلك ناوى تعمل حرب عالمية"

لمعت عينا الزومبي وهو يقول: "لأ هعمل حاجة أسرع، هعمل حرب على مية وعشرين وأهو نوصل أسرع"

وقف الزومى يتأمل حمام السباحة الخاص به، أخيراً حقق حلمه وحلم فريقه وسيطروا على العالم، كان يقف على حافته في فيلا خاصة به وتحيطه الأشجار المورقة، صحيح أنه كان ليلاً إلا أن اكتمال القمر أعطاه رؤية جيدة وشعوراً حسناً، وضع كأس الماء البارد جانباً وهو يخلع ملابسه وينزل إلى الماء، كان بارداً باعتدال بما يكفى ليلطف الجو ويخفف درجة الحرارة قليلاً، بدأ يعوم وهو يغلق عينيه ويتذكر صراعه مع دولة الخلافة الإسلامية، ذراع القوة الذى امتلكه أخيراً، منفذ أوامره الذى لا رادع له ولكنه فجأة شعر أن سمك الماء يزيد، بدأ يشعر بصعوبة، فتح عينيه ليجد أن مياه حمام السباحة تبدلت بالدم، شعر بالفزع وهو يحاول الخروج ولكن على حواف الحمام وقف ضحاياها، قتلة وموتى ومهتوك أعراضهم فى انتظاره ليتموا قصاصهم، شعر بالفزع فقرر ألا يخرج الآن مؤقتاً، خاف أن يصيح لينادى على أي من أصدقائه، يدور حول نفسه بهلع يتأملهم وعددهم يزيد، يتسلق بعضهم البعض من أجل أن يحظى برؤية أفضل، المخيف أكثر من عددهم المهول هو عيونهم، لا وجود لها !

كان هذا شيء مفزع بحق، لا يعرف إلى ما ينظرون، محاجر فارغة تتطلع إليه، كان يدور حول نفسه بسرعة كيلا يفاجئه أحدهم من خلفه، ولكن بعض الصغار قرروا أن يهبطوا للحمام، بدأوا يسبحون إليه وكلما اقتربوا كلما ساحت جلودهم وتهدلت لحومهم، بدأ يشعر بالفزع فعلاً يغتصب جوانحه وكلما اقترب منه طفل تسمر واقفاً للحظة قبل أن يبدأ بالصراخ وهو يسأل: "ألم ترمى؟"

"ماما فين؟"

"وين أمايا"

"أمااااا"

بدأ صراخ الصغار يعلو ودقات قلبه تعلو قبل أن يفتح عينيه سريعاً ليجد نفسه نائماً في غرفته وأصدقائه ينامون بجواره منهم من ينام على الأرض ومنهم من ينام على أرائك، بدأ يتنفس بصعوبة، أغلق عينيه للحظات كي يلتقط أنفاسه قبل أن يفتحها فجأة ليجد الجن يتطلع إليه، فزع فقال: "أعوذ بالله من الشيطان الرجيم"

تبدلت خلقة الجن وهو يتنظر له بلوم ويقول: "إيه يا عم شوفت عفريت؟"

لم يرد عليه الزومى قبل أن يستوعب الجن وهو يقول: "لا مؤاخذة يا ريس، إنت فعلاً شوفت عفريت"

خرج الزومى إلى الشرفة ليلطمه الهواء البارد وهو يتنفس بعمق محاولاً طرد الفزع من قلبه قبل أن يسمع صوتاً يقول في الظلام: "طبعاً إنت جاى هنا هريان من كابوس؟"

خرج جاكى شان من الظلام وهو يبتسم مستنداً على عصاه، هز الزومى رأسه إيجاباً وهو يقول: "أنا بقيت حاسس إني عايش في كابوس"  
ابتسم جاكى شان وهو يقول: "هحكيلك حكاية هتهون عليك أوى ... زمان كان فيه حكيم صيني قال آه يانا منه آه يانى"

ضرب الزومبي كفاً بكف وهو يقول : "الساحر محضرلنا محمد نجم  
مش جاكي شان"

أجابہ جاکی شان ضاحكاً : "بحاول أروح عنك"  
"حاول تروح أحسن"

"خلاص، حقك عليا، الحكيم الصيبي دا قال إيه؟"

"ما أعرفش والله، إنت اللى بتحكى ... هعرف منين أنا"

"قال إن كان فيه زمان مملكة بيقودها ملك عظيم ومغوار وكان  
الخير في كل الأركان، الناس مبسوطة من زمان، والرزق واسع في كل مكان،  
كان اسمها مملكة أذربيجان، كل اللى فيها مبسوطين سواء إنس أو جان"  
"هو اللى كاتب القصة أيمن بهجت قمر؟؟ ... ما تحكى من غير وزن يا  
عم"

"المهم الملك مات وابنه الكبير هو اللى هيحكم، ابنه كان طالع لأمه"

"ساكنة في الثالث يعني؟"

"لا طالع زيه يعني؟"

"طرى؟؟"

"يا ابني الله لا يسينك، طالع في أخلاقها يعني، مش صبور وعصبي،  
المملكة دى كانت بتعتمد اعتماد أساسى على استخراج الماس"

"استخراج الناس منين؟"

"هقوم خابطك بالكوباية فى دماغك وسايبك وماشى ... بطل رعى  
واسمع"

"فى يوم الناس راحوله جرى ... يا ملك ... يا ملك الماس خلص ... كل  
المناجم مش لاقية ماس؟، حفرنا كتير ومفيش ماس، فى المواقف اللى زى  
دى كان أبوه بيععمل إيه؟، بيامر بالحفر وممكن يقعدوا سنة يحفروا لحد  
ما ربنا يكرمهم، صاحبنا خلقه ضيق قالك خلاص اقفلوا المناجم وشوفوا  
حتة جديدة احفروا فيها، جه الوزير قاله لأ، الصبر يا مولاي، قاله مفيش  
وقت إحنا فى مرحلة انتقالية ولازم البلد تمشى أحسن من أبويا الملك كان  
ممشيا، غير المناجم وبدأ الحفر الجديد ولكن زى ما يكون ربنا كاتب إن  
الماس ما يظهرش، بدأ العمال يتعبوا من قلة الماس، مفيش ماس مفيش  
فلوس دا كان قرار الملك، تخيل ! .. وقف مرتبات العمال لحد ما الماس  
يظهر والعمال رفضوا الشغل وأضربوا قام منزل قوات الجيش تضربهم،  
بقت حرب بينه وبين الشعب انتهت بإنهم قتلوه ومثلوا بيه ولأنهم شعب  
أصيل وما بينساش الخير جابوا أخوه الصغير وقالوله إنت اللى عليك  
الدور تحكم، الأمير الصغير كان طالع لأبوه"

"أه، اللى هو فى الرابع ... صح؟"

"ولا كأتى سمعت حاجة، أمر الأمير الصغير بصرف ضعف المرتبات  
للعمال وتقشف هو وأهل بيته من غير ما يقولهم، شاف سنة سودا تقريبًا  
ما كانش بياكل فيها غير كسرة عيش كل يوم عشان تفضل مرتبات العمال  
شغالة وبعد فترة بدأ الماس يظهر تانى وبدأت الحياة تزدهر، العمال فى يوم  
راحوله تحت القصر وقالوله انزل"

"من الرابع، ما هو كان عند أبوه ... مركز أنا"

"يا ابني أنا صيني، كده هتكسر منك، بس بقى"

"أسف"

"نزلهم الأمير قالوله إنت خليت مرتباتنا الضعف وجيت على نفسك، دلوقت الماس ظهر والحمد لله هنرتاح والماس اللى ظهر أكثر بكتير من اللى كان بيظهر أيام أبوك عشان كده إحنا جايين نطلب منك تخلى مرتباتنا النصف ... مش حتى يرجعوها زى ما كانت، لا نصفها كمان، ومن بعدها المملكة ما شافتش يوم واحد وحش"

"حلو أوى، إيه علاقة القصة دى بالكابوس اللى أنا حلمت بيه؟"

ابتسم جاكى شان وهو يتركه ويرحل محافظًا على ابتسامته

جلس الزومى فى الصباح على مائدة كبيرة وهو يجمع الفريق حوله، كان صامتًا يفكر ويجواره الساحر الذى تبدلت ملامحه لتنبئ أنه أفضى إليه ما فى قلبه، تحدث الساحر أولًا : "فى مشكلة كبيرة، إحنا لما جينا هنا كنا جاينين عشان نتعلم منهم إزاي قادرين يسيطروا على العالم وعلى الدول دى، اللى بنشوفه من برا غير اللى بنشوفه من جوا"

قاطعته مديحة : "يمكن الإزاز مش نضيف ولا حاجة فانت مش شايف من برا كويس؟"

تحدث الفامباير : "ما تتكلميش تانى يا مديحة، من فضلك"

عاد الساحر يستكمل حديثه : "كل واحد فىنا شاف حاجات لوحدها ممكن ما تمثلش حاجة لكن لما تتحط جنب بعضها هتديك شكل نهائى زى البازل، الناس دى مش عاوزة رفعة الإسلام"

قال مساعد الساحر : "أمال عاوزة إيه؟، رفعت إسماعيل؟"

قاطعه الجن برسالة عقلية : "بس يا حبيبي، ما تجيبش سيرة حد من الناس المحترمة دى عشان محدش يزعل مننا"

عاد الساحر لاستكمال حديثه : "الناس دى مش عاوزة رفعة الإسلام ولا تطبيق الشريعة، تطبيق الشريعة عندهم زى تطبيق الغسيل، حاجة مش مهمة أوى، مش كلهم كده للأمانة فيه اللى عاوز ده بس الأغلبية"

فرحانة بالنفوذ والقوة والسلطة، اللي عاوز الإسلام ينتشر ما ينشروش بالدم والقتل، الكلمة الطيبة أحسن 100 مرة من الدم والقتل، والإسلام دين خير وسماحة، واللى هيقولى فيكم سماحة المكوجى هضربه على وشه، الناس دى بالظبط زى عرايس الماريونت، حد بيلعب بيهم من ورا الكواليس وإحنا مش شايفينه، الزومى لما جه شاف واحد أجنى بيديهم فلوس مقابل حاجة، صدقونى مش هتحتاج مننا تفكير كثير عشان نفهم الغرب عاوزها إزاي، بقى معقول الجيش الأمريكى اللي بيفتخر إنه قادر يحقق السلام على أى بقعة من بقاع الكوكب مش عارف يسيطر على مجموعة من الأغبية اللي مش عارفين أى حاجة فى الدين إلا القتل؟، حاجة مش منطقية ... صح؟"

صمت الجميع قبل أن يسأل المذؤوب: "طب إيه الخطوة الجاية؟"

تحدث الزومى: "لو قلنا للناس دى إنهم إرهابيين وأغبية هيقتلونا" صرخت مديحة: "هيفتصبونى؟"

قال الفامباير بصوتٍ خافت: "محدث ممكن يأذى نفسه بالمنظر

ده!"

صرخت فيه: "بتقول إيه؟"

"يعنى بقول ربنا يسترها عليكى يا قلبى"

"وجع فى قلبك"

"أنا أسف"

"أسف في كبدك"

"مفيش حاجة اسمها كده أصلاً"

قاطعهم الزومى : "الحل بقى إننا نلعبها صح، هنجيب أمير المؤمنين القديم أبو بكر البغدادي ونقوله إننا مش أد المهمة العظيمة اللى ربنا اصطفاه عشان يعملها وكلمتين كده لحد ما يفرح إنه أمير المؤمنين تانى ونوعده إننا هنكون دراعه اليمين في مصر"

قال جاكى شان : "أنا ممكن أبقى دراعه الشمال في الصين"

قالت مديحة : "وأنا هبقى رجله الشمال في العتبة"

قال الساحر : "هو إنتى لو سكتى هيشاوروا عليكى ويقولوا اللى سكتت أهى، إسكتى بقى"

"ألا ينسونى"

"محدث يقدر ينسأكى يا مديحة، ما تخافيش يا حبيبتى"

"إنت حبيبتى بجد؟؟؟"

قاطعها الفامباير : "أنا قاعد على فكرة!"

"لا مؤاخذة يا سى الفامباير، أصلى من زمان نفسى أسمع كلام حب وأشعار"

بصق الساحر عليها وهو يعطى الإذن للزومى ليستكمل حديثه :

"عاوزين بقى نشكر جاكى شان عشان هو اللى ألهمنى للفكرة دى"

وقف جاكى شان يحيى الجميع وهم يصفقون له ويقول : "عاوز  
أشكر ربنا على الإلهام ده وبعدها أشكر السيد الرئيس راعى ال...."

قاطعه الساحر وهو يقول : "مش حنة والدتك هي، أقعد"

تحدث الساحر للزومى : "هات تليفونك أكلم أبو بكر البغدادي  
نقوله يبجي، إنت مسجله إيه؟"

"بغدادي إرهاب باين ... دور هتلاقيه"

بدأ الساحر يبحث فى الأسماء وهو يقرأها بصوت خافت : "الحاج  
أحمد كشرى، الحاج محمد عضمة، الحاج عبده القط، الحاج مينا  
صليب، الحد ... الحاج مينا صليب!!!!"

"يعنى إنت سايب إن فيه مذؤوب بيتكلم وفامباير شاقط مديحة  
وجاكى شان بيتكلم عربى وزومى أمير مؤمنين وقط معاه لغات وجن أخرس  
وقفشت فى دى؟! ... دور بس هتلاقيه"

"أهو لقيته، هتصل بيه"

انصرفت مديحة فى توتر وقلق لتختلى بنفسها بعيداً وهى تراقبهم  
كالصقروهى تنقل الأخبار للفريق الآخر الذى استقبل الأخبار بلهفة

\*\*\*

جلس الجن مرزوق أمام الساحر يقول له : "الزومى بقى أمير  
المؤمنين"

"حلو"

"وبيفكر يسيها"

"حلو أوى"

"وهيرجعوا مصر تانى"

"حلو أوى أوى"

"هو إيه اللى حلو أوى؟"

"عصير المانجا ده يجنن، كنت بتقول إيه بقى؟"

"الزومى بقى أمير المؤمنين وسامها وراجعين مصر"

"طب إنت شايف الحل الصبح إيه؟"

"أنا بقول نروح داعش ونحاول نسيطر"

"منطقيًا دا الحل الصحيح خصوصًا وإنهم سيطروا هناك وفرضوا

ايدلوجية التواجد بصفة دائمة لكن العضو الموجود هناك قالك إيه؟"

"قالى إن من الأفضل نفضل هنا لحد ما يرجعوا ونواجههم هنا

ونحاول نوجد قوانا سوا"

"لما تيجى تفكر وتحط ديناميكية التفكير المنطقى نصاب عينيك

هتلاقى إن ده الحل الأمثل"

نظر الجن للساحر قبل أن يسأل مساعده : "طب إنت شايف إيه؟"

"شايفكم ... هاهاهاها"

أشار له الجن وهو يقول شيء ما لم يتبينوه فمت تمامًا، حرك شفثيه محاولاً التحدث بلا صوت، دمعت عيناه وهو يترجى الجن بلا صوت فأعاد له صوته، تحدث قائلاً: "أنا غلطان يعنى إنى بحاول أقول طرفة؟"

أجاب الساحر: "إتطرفت عينك بسكينة مطبخ يا بعيد"

نظر مساعد الساحر للجن وهو يقول: " وإنت بقى بتسكتنى، طب أعوذ بالله من الشيطان الرجيم"

لم يحترق الجن هذه المرة بل ابتسم وهو يقترب منه ونيرانه تتصاعد وتقرقع فى عنف، تحدث مرة أخرى: "بسم الله الرحمن الرحيم"

لم يحدث شيء هذه المرة أيضًا وازدادت ابتسامة الجن وحشية وهو يقول: "أسلمت وهطلع عين أمك"

حوله الجن لجرى صغير وتركه ينبج وهو يبتسم بشماتة غير عابئ به وهو ينظر للساحر الذى بدأ يخشاه وهو يقول: "من هنا ورايح كلامى يتسمع، هما جايين ولما يججوا هنزوح نستقبلهم وهناك هنعرف هنعمل إيه بالظبط"

وقف أمير المؤمنين السابق أبو بكر البغدادي أمام الفريق ينظر لهم بغل لا يوصف، لو تحدثت عيناه فستنطق بأشد آيات الكفر طراً، ها هو أمام المغتصب الذي سلبه حقه الذي طالما حلم به وأراده. نظر له الزومبي وهو يتسم محاولاً تلطيف الأجواء قبل أن يسأله : "عارف أنا جايبك هنا ليه؟"

نظر البغدادي أرضاً قبل أن يقول : "من أجل أن تشفى غليل غرورك وترانى مذلولاً راکعاً في سلطانك، ولم لا؟ ربما تجرب أيضاً أن تقتلني قتلاً شنيعاً وتعذبني عذاباً شديداً، يالك من ظالم، أتعذب أعزل يقف في حضرة احترامك صامتاً؟ ... هذه والله ليست من شيم الأمراء ، لم لا تكون رجلاً وتخرج لتبارزني بالخارج؟ ... أتبارز واحداً من رجالك؟؟ أحد أخلص أتباعك؟ ... فلتعلم أننى سأنتظر إلى أن تحين اللحظة لأقتلك وأسترد ملكي ... أنا عبدك المخلص ورجلك الباريا مولاي"

سأله مساعد الساحر بفضول : "إنت مجنون يا حاج؟ ... محتاج تدخل جراحي يعني؟"

قاطعه الزومبي : "خلصت أفورة يا حبيبي ... ابقى رد على أد السؤال ... قول لأ وخلص، فهمت؟"

أجابه البغدادي : "لأ"

سأله الزومبي : "كويس أوى"

نظر له الساحر وهو يقول : " أقسم بالله أنا أتحدسد ... قاعد بتابع حوار إثنين أغيبيا، ركزيا عم منك ليه بقى "

هز الزومى رأسه وهو يسأله : " قلتلى بقى أنا جايبك هنا ليه؟ "  
"لا"

" مش لأ قول معرفش ... تعرف؟ "

" معرفش "

" متعرفش تقول معرفش؟ "

" أعرف "

" يبقى متعرفش "

" ولا أعرف "

قاطعهما الساحر : " كون واسع مترامى الأطراف، فيه مليارات النجوم، ملايين المجرات، مليارات الكواكب، حظى أنا يقع فى أتفه كوكب فى أتفه مكان مع أتفه إثنين فى الكون بيتكلموا فى أتفه موضوع ممكن "

وقفت مديحة وهى تقول : " أنا عندى سؤال مهم أوى وممكن يساعدنا نفهم الأمور كلها ... ينفع أسأل؟ "

رد عليها الزومى والساحر والبغدادى فى صوت واحد : " لأ "

أجابت مديحة : " كويس أوى ... السؤال بيقول : لو فيه غابة كبيرة أوى وقعت فيها شجرة ... هل بقية الشجر أصحابها بيضحكوا عليها؟ "

نظر الساحر للفامبير قائلاً : "قوم يا حبيبي كبر في وذن مراتك وهدئها شوية ... دا بيبقى شيطان أصله"

أشار الساحر للجن وهو يسأل : "ده؟"

هز الساحر رأسه وهو يقول : "بس بقى، كرهتوني في نفسى، ركزوا"  
فجأة صاح القط : "وعهد الله يا مديحة الكلب إنتى أكون هابشك في وشك مشوهك أكثر ما إنتى مشوهة"

سأله المذئوب : "مالك بس ... إيه اللي حصل؟"

أجابته القط غاضباً : "بتحط ديلى في وذنى ... تخيل؟؟ ... مديحة بتفاجئنى بغبائها والله"

صاح به جاكى شان من الخلف : "عمو الساحر ... أنا عاوز دوا السكر إلهى يباركلك"

نظر الجن أرضاً دامع العينين وهو يبعث برسالة عقلية لهم : "مفيش أمل ... حسى الله ونعم الوكيل"

ربت المذئوب على ظهره وهو يواسيه : "معلش بكرة تتعدل"

نظر له الجن وهو يسأل : "بكرة الأربع؟؟"

صرخ بهم الساحر ليصمتوا قبل أن يقول الزومى للبغدادى :  
"هقولك أنا جايبك هنا ليه ... هس ... ما تفتحش بقك خالص ... أنا جايبك عشان أقولك مبروك عليك الإمارة"

سأله البغدادي : "العمارة؟"

"الإمارة يا متخلف ... مبروك إنت هترجع أمير المؤمنين تانى"

"أتمزح؟"

قالت مديحة : "أتمزح السلم"

ربت عليها الزومى وهو يقول : "بس بقى يا أمى بقى"

نظر الزومى للبغدادي وهو يقول : "عاوزك تفكر فى مدى الظلم والقهر اللى إنت كنت حاسه لما سبت الإمارة اللى هى حقك ... ناس كتير إنت بتسلمها حقها ... ناس كتير إنت بتظلمها ... ناس كتير بتحس بالقهرة بسببك ... مش هقولك غير طريقتك ... مش هقولك بطل دبح ... هقولك فكر"

ابتسم أبو بكر البغدادي وهو يقول : "اللجنة على كل ظالم، اللجنة على كل قاهر، اللجنة على كل مغتصب"

صاح الزومى : "قلعنا وسابنا عرايا"

صفعه الساحر على قفاه فصمت معتذراً قبل أن تسأل مديحة :  
"هو فيه هنا مغتصبون؟"

سألها الساحر : "دا كل اللى بتفكرى فيه؟"

"لأ يعنى بس لو فيه ... أهو نبقى طلعلنا بمصلحة من المشوارده"

قاطعها الفامباير : "أنا هنا على فكرة ... هنا!!!"

نظرت له قبل أن تسأل الساحر: "تفتكر سمعنى؟"

قال لها الفامباير بسخرية: "الأ ما سمعتكيش"

قالت للساحر: "ما سمعنيش الحمد لله"

قاطعهم أبو بكر البغدادي: "وأنتم أين ستذهبون؟"

قال له الساحر: "راجعين مصر، هنوصل أقرب مدينة فيها مطار  
ومن هناك هنتصرف"

"سأحدثك بالعربية المصرية ... العامية كما تسمونها، مش عاوزين  
سلاح"

"لا متشكرين إحنا معانا الجن هيخفيننا"

"أى حاجة تدافعوا بيها عن نفسكم ... سافوريا ... سنجة ... سكينه  
... ساطور"

"إنت مذاكر حرف السين بس فى كتالوج السلاح ... متشكرين يا  
حاج"

احتضنهم البغدادي قائلاً: "هتوحشونى والله"

قاطعه الزومى: "إحنا رايعين عمرة! ... إوعى يا عم بس لا حد يشك  
فينا"

تركهم وانصرفوا جميعاً والجن يستعد لإنشاء الهالة التى ستخفيهم  
عن أنظار الجميع لحين الوصول لمصر

## في مصر

بمجرد خروجهم من مطار القاهرة وجد أعضاء الفريق سيارة بيجو فئة 7 راكب في انتظارهم يقودها أحد أصدقاء الساحر القدامى وبعد تبادل القبلات والتحيات رحل صديقه تاركًا لهم السيارة، جلس الساحر في مقعد السائق وبجواره مساعده والمذؤوب، في المقعد الأوسط يجلس الفامباير وبجواره مديحة وجاكي شان والقط يجلس فوق قدمي جاكي شان، في المقعد الخلفي يجلس الزومبي والجن، قاد الساحر السيارة لبعض الوقت قبل أن يقرر أن يقود على الطريق الدائري، توقفت السيارة تمامًا نتيجة الزحام غير المبرر، سألت مديحة بذكاء: "هي العربية ما بتمشيش ليه؟"

أجابها الساحر بنفاذ صبر وهو يمسح عرقه بمنديل: "مشلولة يا مديحة"

ربت الفامباير على كتفها وهو يقول: "بس يا مديحة بقى فيه إيه ... مكنتيش كده!"

أجابته: "الحريا سى الفامباير، الحر مفرهدنى وقلقانة على العيال أوى"

"عيال مين؟"

"ولادنا يا أبو مسعدة"

"مبدأياً مش هسمى مسعدة أنا، ثانياً هنخلف إزاي من غير ما نتجوز؟"

"عندى استعداد أخلف منك هنا ودلوقت "

صاح بها الساحر من الأمام : "بس بقى يا بنتى بقى، مش هيبقى حر وقلبة نفس"

سألته : "وهو أنا قلبة نفس؟"

أجابها : "بصى للغلبان اللى من ساعة ما جيبتيه سبرة الجواز والخلفة وهو قاعد بيحب اللى فى بطنه"

بدأ جاكى شان يتحدث : "ما إنت لو قرفان من مراتك أوى كده ممكن تخلف منها من غير ما تلمسها!"

سأل الفامباير باهتمام : "إزاي بقى؟"

"سمعت عن عمليات التلقيح؟"

"تلقيح البويضات وكده؟"

تدخلت مديحة فى الحوار : "بويضات إيه بس، هو يقصد نلقح على بعض بالكلام"

نظر جاكى شان للقط وهو يقول : "والله لولا إن فيه نينجا طلعا  
عليها وهى صغيرة وقطعولها وشها بالسيوف كده وشوهوها كنت شوقتها  
أنا"

نظر لها القط وهو يقول : "هو دا وشها الحقيقى على فكرة"

أخرجت مديحة من حقيبتها مشبك غسيل وأغلقتة على ذيل القط  
الذى قفز فى ألم فاصطدم بسقف السيارة. بعث الجن برسالة عقلية  
للساحر: "عاوز أدخل دورة المياه"

سمعها الزومبى فقال بمرح : "مفيش دورة مياه ... أدخلك دورة  
رمضانية"

نظر له الجن بغضب وهو يبعث برسالة عقلية للساحر : "خلاص أنا  
هتصرف هنا"

ظهرت على وجهه ابتسامة شريرة والزومبى يسأله فى خوف : "إنت  
ناوى على إيه؟"

شعر الساحر بالغضب فصاح بهم وهو يضع يده على التنبيه ( الكلاكس )  
دون أن يرفعها فسبب الإزعاج لمن حولهم جميعًا، بحوارهم  
مباشرة توقفت سيارة مرسيديس أحدث طراز وزجاجها أسود اللون، نزل  
الزجاج ببطء وظهر خلقه شخص أبيض الشعر يرتدى نظارة شمسية وهو  
يهبط من السيارة ويقول للساحر: "إنزلي"

نظر له الساحر وهو يقول : "إطلعلى إنت"

أغلق الساحر زجاج سيارته كمحاولة للهروب من المواجهة إلا أن هذا الشخص فتح باب السيارة وهو يقول : "بتقبل الإزاز وسايب الباب يا غبي"

هبط الساحر من السيارة لمواجهته قبل أن يخلع هذا الشخص نظارته الشمسية، شعر الساحر بالذهول وهو يقول له بدهشة : "إنت؟"  
"عندك مانع؟؟"

"حد في الدنيا يقدر يبقى عنده مانع قصادك؟"

"عاملين دوشة ليه؟"

"أنا هفهم حضرتك، إحنا جايين نسيطر على الأرض"

"دى أمك يلا اللي جاية تسيطر على الأرض، عارف أمك يلا"

"إيه السؤال الغبي ده؟، أه عارفها عادى يعنى، المهم بس هفهمك"

"دى أمك يلا اللي هتفهمنى، عارف أمك يلا"

"أيوه يا عم عارفها، بلاش غباء بقى واسمعنى، أنا ساحر وجايب

فريق من الوحوش عشان نقدر نسيطر على الأرض"

"دى أمك يلا اللي ساحرة وجايبة فريق من خالتك عشان يسيطروا

على الأرض، عارف أمك يلا"

"أنا أمى تاعبالك أعصابك ليه طيب؟"

"دى أمك يلا اللي تاعبة أعصابى"

هبطت مديحة من السيارة ببطء وهي تنظر إلى هذا الشخص، نظر لها في تحدٍ لبعض الوقت قبل أن تبدأ بوصلة ردح : "مالك يا عم إنت، محدش فى مصر كلها قادر يلملك ولا إيه؟ لا، كله إلا مديحة لا مؤاخذة ومش هتقدر ترد عشان لو رديت هخليك إنت كمان لا مؤاخذة، خش عربيتك زى الشاطر كده ولم نفسك أحسنك"

دخل إلى سيارته هارتًا من كلماتها وصوتها المزعج وهو يغلق شباكها كي يختفى عن الأنظار، ابتسم الساحر وهو ينظر لمديحة ويقول لها : "جدعة يا بت"

فتح نافذة السيارة ببطء وأخرج رأسه منها وهو يقول : "دى أمك هى اللى جدعة يلا"

أدخل رأسه وأغلق النافذة سريعًا قبل أن يصطدم حذاء مديحة بالزجاج، فتح الزجاج مرة أخرى وهو يخرج لها لسانه : "مجاش فيا"

قبل أن يستكمل كلمته أصابته الفردة الأخرى فى وجهه فقال بألم : "تسلم أيدك يا معلمة"

بدأ الزحام يخف قليلاً فركب الساحر السيارة وهو يمشى ببطء، دخل الهواء من النافذة فتنفس الجميع بارتياح وهم يتوجهون لبيبتهم

وقفت السيارة تحت البيت وهبط منها أعضاء الفريق ببطء وبصورة  
سنيمائية، خلع الساحر نظارته الشمسية وهو ينظر لزغلول صاحب  
القهوة الذى يمسك فى يده جردل به ماء قدر، ابتسم الساحر وهو يفتح  
ذراعيه يحيى عم زغلول قائلاً: "عم زغلول يا حلو"

قذفه عم زغلول بالماء القذر وهو يقول: "خد فريق المتخلفين  
بتوعك دول واطلع بيتكم"

مسح الساحر وجهه وهو يقول: "الحمد لله على نعمة حب الناس  
والله"

سأله المذؤوب: "مش هتسلم على جلال المكوجى ولا إيه؟"

إجابته الساحر وهو ينظر بخوف تجاه محل جلال: "لا يا عم، الحرق  
فى الوش مفيهوش معلش"

سأله المذؤوب: "أمال فيه إيه؟"

خلفه كان الفامباير يخرج ورقة بعشرين جنيه من جيبه ويضعها بيد  
مديحة قائلاً: "تاخدى عشرين جنيه وتحلى عنى؟"

أخرجت من حقيبتها عشرين جنيه مماثلة: "تاخذ إنت عشرين جنيه  
حالاً وتجييب بوسة"

"ولا كنوز الأرض كلها"

نظرت له مديحة بغضب فحاول استدراك موقفه قائلاً : "ولا كنوز الأرض كلها تخليني أتأخر عنك"

نظرت له بدلال وهي تقول : "إنت هتلاقي فين واحدة زي تحبك الحب ده كله؟"

"في جنينة الحيوانات أعتقد هلاقي كتير منك، وممكن في قناة الناشونال جيوجرافيك ... برنامج : (أعته الكائنات في الكوكب)"

"والله ما هتلاقي زي، واحدة حلوة كده وجسمها مقسم"

"دا تقسيم أراضى يا مديحة يا حبيبتى"

"والله ما أنا رادة عليك بس متحاولش تهرب منى، خلاص إنت قدرى وأنا قدرك"

"أنا لقيت خطة ههرب بيها منك، أنا هطعن في شرفك"

فتحت مديحة المطواة بعنف وصاحت : "بتقول إيه؟"

"عادى يا مديحة فيه إيه، هجيب مخدة وأكتب عليها شرفك وأطعن فيها، نوع من أنواع استخراج الكبت"

"وده يفرق كتير عن استخراج الفحم يا سى الفامباير؟"

صعدوا جميعاً على السلم إلى أن وصلوا للشقة، فتح الساحر باب الشقة ووقف يستنشق هواء الشقة ورائحتها وهو يقول : "يااااه ... الوطن برضه له ريحة محدش يقدر يستغنى عنها"

دخل الزومبي خلفه وهو يستنشق قبل أن يقول : "إيه الريحه القذرة  
دى، ريحة غاز دى ولا حد قالع جذمته دى ولا ريحة مديحة ولا إيه يا  
جدعان"

دخل الجميع إلى الشقة وأغلق الساحر الباب خلفه قبل أن يشير  
لهم أن يقفوا هنا، توجه لمنتصف الصالة قبل أن يصيح بصوت عالٍ :  
"أنا جيت أهو مستنى إيه ... ما تطلع"

بعث الجن برسالة عقلى للجميع متسائلًا : "هو بيكلم مين؟"

نظر الجميع لبعضهم البعض بدهشة إلا مديحة التى ابتسمت  
بسخرية وهى ترى باب الغرفة يفتح ويخرج منه الساحر الآخر ومساعدته  
والجن مرزوق وهو يبتسم بسخرية : "عرفت إنى هنا إزاي؟، حاطط تعاويد  
سحرية ولا شमित ريحتى"

ابتسم الساحر وهو يقول : "لأ مش من ريحتك، إنت مفكر إنك أذكى  
منى؟"

"ده حقيقى"

"لما تحاول تانى تجند عضو فى فريقى ابقى اختار عضو بيافهم"

"إيه؟"

"قصدى يعنى عضو يكون عنده مستوى من الذكاء"

"إيه؟"

"قصدي إن مديحة هبلة ومتخلفة وعندها أعاقة ذهنية وما بتفهمش ومستوى ذكائها متدنى وما عندهاش أدنى مستوى حس وفهم أه بس مش خاينة"

قال الفامباير بيأس من الخلف: "للأسف"

سأله الساحر الآخر بدهشة: "تقصد إيه؟"

"أقصد إن مديحة من الأول كانت بتقولك اللي أنا عاوزك تعرفه، كل المعلومات اللي كانت بتوصلك معلومات عدت عليا الأول وبالتالي قالتك تيجي هنا عشان تستناني وتنصلي فح لكن أنا اللي نصبتك الفخ" مال جاكي شان على المذؤوب يسأله: "هو إيه اللي بيحصل؟"

"إثنين نصايين بيتخانقوا على فخ تقريباً"

ضحك الساحر الآخر في سخرية وهو يقول: "مديحة يمكن ضحكت عليا بس إنت ضحكت عليك الناس كلها، فريق إيه ده اللي إنت جايبه يسيطر على كوكب الأرض، انتم قادرين تسيطروا على نفسكم يا جماعة عيب والله"

قالت مديحة بسخرية وبطريقة سوقية: "شوف مين اللي بيتكلم، الساحر أبو فريق مكون من إثنين ... مساعد من عالم سمس وجن متخلف عقلياً"

صاح بها الساحر لتصمت وهو يقول: "خلى الفريقين برا الموضوع، الموضوع ده بيني وبينك وأنا بتحداك أهو قدام الكل، تبارزني؟"

ضحك الساحر الآخر بسخرية وهو يقول : "إنت تبارزنى أنا؟؟ ... إنت ناسى إنك سقطت فى مادة المبارزة السحرية 3 مرات؟"

ابتسم الساحر بسخرية وهو يقول : "ظالما أنا فاشل ... خايف ليه؟"

أشار الساحر الآخر لفريقه المكون من مساعده والجن مرزوق ليتنحوا بعيداً بينما توقف كل من الساحرين أمام بعضهما البعض وكلاً منهما ممسك بعصاه السحرية وبدأوا فى إلقاء التعويذات السحرية على بعضهما البعض

تفادى الساحر التعويذة الأولى وهو يلقي على الآخر تعويذة "أنست وشرفت" السحرية والتي تجعل المصاب يجلس مكانه ولا يستطيع التحرك مرة أخرى قبل أن يلقي عليه تعويذة "نورت الدنيا" والتي تصيب المصاب بحالة من العمى لا يستطيع أن يرى فيها أى شيء الذى تفادها الآخر مختبئاً خلف المنضدة قبل أن يصعد وهو يجرى ليلقى تعويذة "إحنا زارنا النبى والله" والتي تصيب المتلقى لها بحالة من الخشوع لا يستطيع أن يتحرك سريعاً فيها، تفادها الساحر خلف النيش وهو يلقي تعويذته الجديدة : "البيت بيتك" والتي تصيب المتلقى لها بحالة من الود والدفء وتجعله يرى أعدائه كأصدقاء، تفادها الساحر الآخر وهو يلقي بتعويذته الغير متوقعة : "إكسبراتيوم سلسبيلاك"

توقف الساحر وهو ينظر له بلوم : "فعلاً؟؟، إنت مفكر نفسك فى هوجوورتس، إنت فى الدرّاسة يلا"

أخيراً استعد ساحرنا الهمام بتعويذته السحرية : "والله ما إنت كاسف إيدى" والتي تصيب المتلقى بتخمة تجعله قليل التركيز وقليل

الحركة بينما في نفس التوقيت تمامًا ألقى الساحر الآخر تعويذته السحرية : "يا ألف نهار أبيض" والتي تسبب ضعف حاد في النظر والحركة، اصطدمت التعويذتان ببعضهما البعض فامتصت كل منهما الأخرى ونتج عن تلاقيهما خط أبيض يصل بين رأس كل عصا سحرية والأخرى، بدأ الساحران في الارتجاف والصرخ بينما سألت مديحة الزومى : "الخط ده ... خد اتصالات؟"

هز رأسه نافيًا وهو يقول : "لا خط دا خط المرح السيدة زينب"

هزت رأسها متفهمة بينما توجه المساعدان لمساعدة السحرة وبمجرد أن لمسوا أيديهم بدأت الشقة في التصدع وبدأت هالة ضخمة من الضوء المصحوب بحرارة تكبر من نقطة التلاقي، ضوء أبيض مبهري يغشى الأبصار سيطر على الغرفة قبل أن ينتهي كل هذا بانفجار صغير، صمت الجميع حتى انقشع الغبار قبل أن ينظر الجميع حولهم وهم يبحثون عن الساحران ومساعديهما الذين اختفوا تمامًا في مكان مجهول لا يعرفه أحد، تلفت الجميع حولهم في دهشة غير عابئين بالجن مرزوق الذي تسلل ليخرج من الشقة قبل أن يروه وحيدًا بينما وقفت مديحة في منتصف الصالة وهي تقول : "الساحرفين؟"

مد لها الفامباير يده وهو يقول : "خلاص يا مديحة كل شيء انتهى، الساحر والمساعد بتوعه راحوا وإحنا إتحكم علينا نعيش هنا"

ابتسمت مديحة وهي تقول : "مفيش حاجة راحت، أنا هكون المسؤولة عن الفريق من دلوقت وأنا اللي هقودكم نحو النصر"

ابتلع الجميع ريقهم بصعوبة وهم يشاهدون بداية عصر جديد من  
القوة، عصر مديحة لا مؤاخذة

تمت بحمد الله

## الكاتب في سطور

محمد عصمت عبد الحميد ... روائي شاب من مواليد دمياط ... 1988 شارك من قبل في الكتاب المجمع شيزوفرينيا الحب ... شارك في كتاب (الثائرون) العدد الثالث من اصدارات جمعية ادب الخيال العلمي ... شارك في كتاب (المنتصرون) العدد الرابع من اصدارات جمعية ادب الخيال العلمي ... ولي لجمعية أدب الخيال العلمي حصل علي المركز الثاني في المسابقة قصة (الاختيار الخاطئ)

### صدر للكاتب

رواية ( الممسوس ) في معرض الكتاب 2014

رواية ( التعويذة الخاطئة ) 2014

رواية ( ذاتوي ) 2015

رواية ( صائد الذكريات ) 2016

للتواصل مع الكاتب

<https://www.facebook.com/mohammedesmaat>

oboiikan.com

oboiikan.com

جميع حقوق الطبع والنشر محفوظة للناشر



noon\_publishing@yahoo.com  
0235860372 - 01127772007